

Erhvervsstyrelsi
ulloq 31.8.2015

MISSINGIUT

Aningaasaateqarfiit inuussutissarsiornermik ingerlatsisut pillugit inatsisip Kalaallit Nunaanni atuutilersinneqarnissaa pillugu peqqussut

Aningaasaateqarfiit inuussutissarsiornermik ingerlatsisut pillugit inatsit nr. 712, 25. juni 2014-imeersumi¹ § 136, aamma ukiumoortumik naatsorsuutit pillugit inatsisip inatsisillu allat assigiinngitsut (Allaffissornikkut nammatassat ikilisarneqarnerat, naatsorsuuserinermi nunat tamat akornanni pitsaassusiliinernut tulluarsaanerit, naatsorsuuserinermut peqqussutip nutaap piviusunngortinneqarnera kiisalu paasinartuunissamik peqqussummut allannguinerit il.il.) allanngortinneqarnissaat pillugu inatsit nr. 738, 1. juni 2015-imeersumi² § 9, imm. 2 malillugit inatsit imatut oqaasertaqartillugu Kalaallit Nunaanni atuutilersinneqassasoq aalajangersarneqarpoq:

Kapitali 1

Peqqussutip atuuffia il.il.

Atuuffia

§ 1. Peqqussut aningaasaateqarfinnut, legatinut, iluaqutissiuisunut suliffeqarfinnullu allanut imminnut pigisunut, § 2 malillugu inuussutissarsiornermik ingerlatsisutut isigineqartunut (aningaasaateqarfinnut inuussutissarsiornermik ingerlatsisunut) atuutissaaq.

Imm. 2. Peqqussummi matumani aningaasaateqarfiit inuussutissarsiornermik ingerlatsisut pineqarneranni inatsisitigut pisinnaatitaasut pisussaataitaasullu, pilersitsisup aningaasaataanut utertinneqarsinnaanngitsunik aningaasaatinik, malittarisassat malillugit siunertamat ataatsimut siunertanulluunniit arlaqartunut, ukiuni amerlasuuni malinneqarsinnaasussanut aalajangersimasunut atorneqartussanik pigisaqartut pineqartarput, aningaasaateqarfimmillu atuisinnaaneq pilersitsisumut naleqqiullugu aqutsisunit namminersortunit inuussutissarsiornermik ingerlatsisunit ingerlanneqarpat, tak § 2, imm. 1 aamma 2, aningaasaateqarfiullu aningaasaataanik inuit imaluunniit inatsisitigut pisinnaatitaasut pisussaataitaasullu aningaasaateqarfiup avataaniittut aningaasaateqarfiup aningaasaataanik piginnittuunissamat pisinnaatitaaffeqartussaanatik.

Imm. 3. Aningaasaateqarfimmuut tunissuteqartartut, tapiissuteqartartut assigisaalluunniit peqqussummut matumunnga atatillugu sutigut tamatigut aningaasaateqarfiup pilersitsisuanit sanilliunneqartassapput.

Erhvervs- og Vækstmin.,
Erhvervsstyrelsi, j.nr. 2015-10112

§ 2. Aningaasaateqarfik peqqussut manna malillugu inuussutissarsiutitut ingerlanneqartutut isigineqassaaq, imaappat

- 1) nioqqutissanik pisinnaatitaaffinnilluunniit tigussaangitsunik tunniussisarpat, sullissisarlungi assigisaanilluunniit iliortarluni, taakkulu nalinginnaasumik akissarsissutigisarlugit,
- 2) pigisanik aalaakkaasunik tuniniaasarnermigut attartortitsisarnermigulluunniit sulinermik ingerlataqaruni, imaluunniit
- 3) piginneqatigiiffiit pillugit inatsimmi, kunnigip peqqussutaatigut Kalaallit Nunaanni atuutsinneqalersumi § 7-imi taaneqartutut aktianik piginneqatigiiffimmut anpartsselskabimulluunniit, imaluunniit suliffeqarfimmut allamut attuumassuteqaruni.

Imm. 2. Aningaasaateqarfiulli suliaq ingerlataa, imaluunniit imm. 1, nr. 3-mi taaneqartutut attuumassutaa killeqarpat, imaluunniit aningaasaateqarfiup aningaasaataanut tamarmiusunut naleqqiullugu pingaaruteqanngitsumik annertussuseqarpat, aningaasaateqarfik inuussutissarsiornermik ingerlatsisutut isigineqassanngilaq.

Imm. 3. Aningaasaateqarfiit inuussutissarsiornermik ingerlatsinerata qaqugukkut killeqartutut isigineqarnissaa imaluunniit aningaasaateqarfiup aningaasaataasa ilaannik annikitsuinnarmik ilaqartutut isigineqarnissaa pillugu maleruagassanik erseqqinnerusunik Erhvervsstyrelsi aalajangersaasinnaavoq.

§ 3. Peqqussummut ilaanngillat

- 1) Danmarkip Nationalbankia,
- 2) aningaasaateqarfiit inatsisikkut imaluunniit inatsit malillugu pilersitat imaluunniit Kalaallit Nunaanni naalagaaffimmilu allami inuunnaat akornanni isumaqatigiissuteqarnikkut pilersitat, naalagaaffiillu arlaannit nakkutigineqartut,
- 3) aningaasaateqarfiit, kommunip nunalluunniit immikkoortuata isumaginninnermut inatsisit malillugit pisussaaffiisa eqqortinneqarnissaannut kommunimut nunalluunniit immikkoortuanut isumaqatigiissuteqarsimasut, suliaasanik allanik annertuunik aningaasaateqarfik suliaqanngippat, imaluunniit
- 4) aningaasaateqarfiit, akuerisaanissamut imaluunniit pisortanit tapiiffigineqarnissamut piumasaqaatitut inatsisit allat imaluunniit inatsisit allat malillugit aalajangersakkat malillugit pisortat oqartussaasuinit nakkutigineqartut aningaasaqarnikkullu nakkutigineqarlutik.

Imm. 2. Aningaasaateqarfiup peqqussut manna malinnagu allatigulli pisortanit nakkutigineqartup aningaasaqarnikkullu nakkutigineqartup, peqqussummik matuminnga tamakkiisumik ilaannakortumilluunniit malitsinnginnissaa aningaasaateqarfinnut oqartussat aalajangersinnaavaat. Aningaasaateqarfimmik pilersitsisoq nakkutilliinnermut oqartussaasuuppat, aningaasaateqarfiup peqqussummit matumangga ilaatinngitsoorneqarsinnaanngilaq.

§ 4. Aningaasaateqarfik peqqussummut matumunnga ilaassanersaq nalornissutigineqartillugu, Erhvervsstyrelsi aalajangiisuussaaq.

Aningaasaateqarfiit inuussutissarsiornermik ingerlatsisut aqqi

§ 5. Aningaasaateqarfiit inuussutissarsiornermik ingerlatsisut aterminni oqaaseq aningaasaateqarfik atussavaat.

Imm. 2. Taaguut aningaasaateqarfik inuussutissarsiornermik ingerlatsisoq imaluunniit inuussutissarsiornermut aningaasaateqarfik imaluunniit naalisaaneq ERF taamaallaat

anigaasaateqarfimmit § 12, imm. 1 malillugu nalunaarsugaasumit imaluunniit nalunaarsugassatut nalunaarutigineqartumit atorneqarsinnaavoq.

Imm. 3. Ateq anigaasaateqarfiit suliffeqarfiillu allat, Erhvervsstyrelsen qarasaasiaqarfiani nalunaarsugaasut aqqinit erseqqissumik allaanerussaaq, paatsuugassaassanani. Ilaqtariit aqqi, suliffeqarfiit aqqi, pigisap aalaakkaasup aqqa immikkuullarissaq, nioqqutissanut ilisarnaat, niuernermit ilisarnaat assigisaalluunniit, anigaasaateqarfiup susassarinnngisai, imaluunniit taakkuosorineqarsinnaasut atermut pisussaaffiginagu ilanngunneqassanngillat.

Imm. 4. Anigaasaateqarfiit allakkani sulinerimullu atatillugu pappialani allani, ilanngullugit qarasaasiakkut nalunaarutiminni aamma anigaasaateqarfiup qarasaasiakkut nittartagaani ateq, angerlarsimaffik kiisalu Erhvervsstyrelsen qarasaasiaqarfiani nalunaarsugaanermut normu allassimassavaat.

Imm. 5. Saniatigut taaguutinut imm. 1-4 assigisaanik atorneqassapput.

Piginneqatigiiffissuit

§ 6. Anigaasaateqarfik § 2, imm. 1, nr. 3-mut ilaasoq anigaasaateqarfittut piginnittut isigineqassaaq, aktianillu piginneqatigiiffik imaluunniit andelselskabi imaluunniit taakku arlaqartut anigaasaateqarfiup taaneqartut atassuteqarfigisai suliffeqarfittut pigisatut isigineqassapput.

Imm. 2. Anigaasaateqarfik piginnittoq suliffeqarfik imaluunniit suliffeqarfiit pigisani peqatigalugit piginneqatigiiffissuavoq. Piginneqatigiiffiit pillugit inatsimmi, kunngip peqqussutaatigut Kalaallit Nunaanni atuutilersinneqartumi § 7-imi tunngavik ataaseq arlaqartulluunniit anigaasaateqarfiit arlaqartut eqqortippassuk, tak. peqqussummi matumani § 2, imm. 1 nr. 3, taamaallaat anigaasaateqarfik suliffeqarfiup anigaasaqarnikkut ingerlatsinikkullu aalajangiisarnernut aalajangiisumik sunniuteqartoq anigaasaateqarfittut piginnittut isigineqassaaq.

Pigisanik agguaassinermit eqqartuussiviup aamma SØ- og Handelsrettip pisinnaatitaaffii

§ 7. Inatsit manna malillugu pisinnaatitaaffiit pigisanik agguaassinermit eqqartuussivimmut tunniunneqarsimatillugit, pineqartut Kalaallit Nunaanni eqqartuussivimmit suliarineqassapput.

Kapitali 2

Attaveqatigiinneq

§ 8. Pissutsit peqqussummut matumunnga imaluunniit peqqussut manna malillugu aalajangersakkanut ilaasut pillugit Erhvervsstyrelsimit tassungalu allakkatigut attaveqatigiinnerit tamarmik digitalimik ingerlanneqarnissaat pillugu maleruagassanik inuussutissarsiornermit ineriartortitsinermullu ministeri aalajangersaasinnaavoq.

Imm. 2. Digitalimik attaveqatigiinneq pillugu maleruagassanik erseqqinnerusunik inuussutissarsiornermit ineriartortitsinermullu ministeri aalajangersaasinnaavoq, it-mi periutsit aalajangersimasut, digitalimik ilusiliinerit aalajangersimasut, digitalimik atsiorerit assigisaasaluunniit atorneqarnissaat ilanngullugu.

Imm. 3. Digitalimik nalunaarut nalunaarummik tiguisussamit tiguneqarsinnaasunngoruni, apuussimasutut isigineqassaaq.

Imm. 4. Pissutsit peqqussummut matumunnga imaluunniit maleruagassanut peqqussut manna malillugu aalajangersagaasunut ilaasut pillugit allakkatigut Civilstyrelsimut tassanngalu attaveqatigiinnerit tamarmik digitalimik pinissaat pillugu inuussutissarsiornermit

ineriartortitsinermullu ministeri inatsisinik atuutsitsinermut ministerimut isumaqatigiinniareernermigut aalajangersaasinnaavoq. Imm. 2 aamma 3 tamatuma assigisaanik malinneqassapput.

§ 9. Peqqussut manna imaluunniit aalajangersakkat peqqussut manna malillugu aalajangersagaasut malillugit aalajangiinernik uppernarsaatitullu allakkianik allanik atsiorneqanngitsunik, aalajangiinermik imaluunniit uppernarsaatitullu allakkiamik kiap nassiussisuunerata paatsuugassaannngitsunik paasinissaanut qulakkeerinnittumik maskinakkut assigisaanilluunniit periuseqarluni assilisamik atsiugaasunik Erhvervsstyrelsen nassiussisinaanera pillugu maleruagassanik inuussutissarsiornermut ineriartortitsinermullu ministeri aalajangersaasinnaavoq. Aalajangiinerit uppernarsaatitullu allakkianik taamatut ittut aalajangiinernut uppernarsaatitullu allakkianut nammineerluni atsiugaasunut naligiissinneqarput.

Imm. 2. Aalajangiinerit uppernarsaatitullu allakkianik, taamaallaat elektronik atorlugu paasissutissanik suliarinneq tunngavigalugu aalajangigaasut imaluunniit allakkiaasut, taamaallaat Erhvervsstyrelsen nassiussisutut taallugu suliarineqarsinnaanerata pillugu maleruagassanik inuussutissarsiornermut ineriartortitsinermullu ministeri aalajangersaasinnaavoq.

Imm. 3. Inuussutissarsiornermut ineriartortitsinermullu ministeri inatsisinik atuutsitsinermut ministerimut isumaqatigiinniareernermigut Civilstyrelsen maleruagassanik imm. 1-ip 2-llu assigisaannik aalajangersaasinnaavoq.

§ 10. Allakkianik Erhvervsstyrelsen Civilstyrelsenimilluunniit suliarineqarani allamit suliarineqartup peqqussut manna imaluunniit peqqussut manna malillugu aalajangersakkat malillugit atsiorneqarsimanissaa piumasaqaatigineqarpat, periutsumik uppernarsaatitullu allakkiamik suliarinnittup kinaanerata paatsuugassaannngitsunik paasineqarnissaanut qulakkeerinnittumik atuinikkut piumasaqaat eqqortinneqarsinnaavoq, taamaattoq tak. imm. 2. Uppernarsaatitullu allakkianik taamatut ittut uppernarsaatitullu allakkianut inummit atsiugaasunut naligiissinneqarput.

Imm. 2. Inuussutissarsiornermut ineriartortitsinermullu ministeri inatsisinik atuutsitsinermut ministerimut isumaqatigiinniareernermigut atsiortoqarsimanissaanik piumasaqaatip avaqqunneqarsinnaaneranut maleruagassanik erseqqinnerusunik aalajangersaasinnaavoq. Uppernarsaatitullu allakkianik ilaannut aalajangersimasunut inuttut atsiortoqarsimanissaanik piumasaqaatip avaqqunneqarsinnaannginnera ilanngullugu aalajangersarneqarsinnaavoq.

Kapitali 3

Nalunaaruteqarnek, nalunaarsuineq piffissaliussallu

Nalunaaruteqarnek nalunaarsuinerlu

§ 11. Aningaasaateqarfiit inuussutissarsiornermik ingerlatsisut, nalunaarummut matumunnga ilaasut taannalu malillugu nalunaarsugaasut pillugit Erhvervsstyrelsen nalunaarsuinerimut oqartussaasutut nalunaarsuiffimmik ingerlataqassaaq. Peqqussut manna malillugu nalunaarsuineq tamanullu saqqummiussineq Erhvervsstyrelsen qarasaasiaqarfia atorlugu pissaaq.

Imm. 2. Paasissutissat Erhvervsstyrelsen qarasaasiaqarfiaatigit tamanut saqqummiunneqartut allanik ilisimaneqalersutut isigineqarput. Erhvervsstyrelsen qarasaasiaqarfiaatigit tamanut saqqummiussimatinnani, pissutsit nalunaarsugassat tamanullu saqqummiussassat allamut atuuttussanngortinneqarsinnaanngillat, aatsaat pineqartoq taakkuninnga ilisimannissimasoq

uppernarsarsinnaagaanni. Pissutsit taamatut ittut sulii saqqummiunneqarsimanninnerisa allat pissutsinik atuutsitsisinnaanerit ajornarsisinnigilaa.

Imm. 3. Nalunaarsuinerit nalunaaruteqarnernulluunniit atatillugu uppernarsaatit allakkianut oqaatsitigut piumasqaatit pillugit maleruagassanik Erhvervsstyrelsi aalajangersaasinnaavoq.

Imm. 4. Ukiumoortumik nalunaarusiap tuluttut suliarineqarnissaanut maleruagassanik erseqqinnerusunik Erhvervsstyrelsi aalajangersaasinnaavoq.

§ 12. Paasissutissat peqqussut manna malillugu pinngitsoorani nalunaarsugassat, inatsisitigut pisussaalersitsisumik aalajangererup imaluunniit pissutsit allanngornerisa kingusinnerpaamik sapaatit akunnerisa tallimat kingorna Erhvervsstyrelsi qarasaasiaqarfianut ilanngunneqarsimassapput, peqqussut manna malillugu allamik aalajangiisoqarsimannigippat. Nalunaaruteqartoq Erhvervsstyrelsi qarasaasiaqarfianut nammineerluni nalunaarsuinnigippat, tak. § 19, imm. 1, inatsisitigut pisussaalersitsisumik aalajangererup imaluunniit pissutsit allanngornerisa kingusinnerpaamik sapaatit akunnerisa tallimat kingorna Erhvervsstyrelsi qarasaasiaqarfianit tiguneqareersimassapput.

Imm. 2. Nalunaarsuinissaq siunertaralugu Erhvervsstyrelsimut nalunaarsuinerit oqartussaasutut nalunaaruteqareeraanni, ilumut nalunaarsuisoqarnissaa imaluunniit nalunaarutiginnissaa qulakkiissallugu siulersuisut pisussaaffigaat.

Imm. 3. Uppernarsaatit allakkianut nalunaarutinullu il.il. Erhvervsstyrelsi qarasaasiaqarfianut tamanut saqqummiunneqartussanut imm. 1 aamma 2 tamanut saqqummiussinerit assigisaanik atorneqassapput. Nalunaaruteqartoq Erhvervsstyrelsi qarasaasiaqarfianut nammineerluni nalunaarsuinnigippat, tak. § 19, imm. 3, pisup pineqartup pinerata kingusinnerpaamik sapaatit akunnerisa tallimat kingorna Erhvervsstyrelsi qarasaasiaqarfianit tiguneqareersimassaaq.

Imm. 4. Piffissaliussat peqqussummi matumani aalajangersagaasut sivitsorneqarnissaat Erhvervsstyrelsi nalunaarsuinerit oqartussaasutut akuersissutiginnissavaa.

§ 13. Siulersuisunut pisortaanernullu ilaasortat kiisalu kukkunersuisoq Erhvervsstyrelsi qarasaasiaqarfianit nalunaarsorneqassapput.

Imm. 2. Suliap naammassinninnerani kukkunersuisut nikisinneqarpata taarsiisoqarpat, imaluunniit siulersut kukkunersuisullu akornanni isumaqatigiinninnerit kukkunersuisup taarserneranut pissutaappata, suliap unitsinneqarneranut pissutaasoq pillugu siulersuisut sukumiisumik nassuiaataat nalunaarsuinerit imaluunniit nalunaarsuinissamut nalunaarummut, tak. § 12, imm. 1, ilanngunneqassaaq.

Imm. 3. Pilersitsisut nalunaarsorneqarnissaannut maleruagassanik Erhvervsstyrelsi aalajangersaasinnaavoq.

§ 14. Pilersitsinerit imaluunniit tunngaviumik aningaasaatit amerlisinneranni, aningaasaateqarfiup tamatumunnga atatillugu aningaasartuutai pillugit paasissutissat nalunaarsuinerit imaluunniit nalunaarsuinissamut nalunaarummut, tak. § 12, imm. 1, ilanngunneqassapput.

§ 15. Pissutsit nalunaarsorneqartussatut kissaatigineqartut peqqussummi matumani aalajangersakkanik imaluunniit peqqussut manna malillugu aalajangersakkanik imaluunniit malittarisassanik eqqortitsinnigipata, nalunaarsorneqassanngillat. Aammattaaq aalajangerneq nalunaarsuinissamut tunngavigineqartoq peqqussummi matumani imaluunniit peqqussut manna malillugu aalajangersakkanut imaluunniit malittarisassanut naapertuutinnigippat, nalunaarsuisoqassanngilaq.

Imm. 2. Nalunaaruteqartoq, pissutsinik Erhvervsstyrelsi qarasaasiaqarfianut nalunaarsuisoq, imaluunniit Erhvervsstyrelsi qarasaasiaqarfianut nalunaarsugassanngorlugu tamanna pillugu nalunaarummik nassiussisoq, nalunaarsuinerup nalunaaruteqarnerulluunniit inatsisit malillugit pinissaanut akisussaavoq, aamma piginnaatitsissutip pisariaqartinneqartup ilaatinnissaa, kiisalu nalunaarsuinermut nalunaaruteqarnermulluunniit atatillugu uppersaatit atorsinnaanerit ilanngullugit.

Imm. 3. Uppersaatitit allakkianut il.il. peqqussut manna malillugu Erhvervsstyrelsi qarasaasiaqarfiaqatigut tamanut saqqummiunneqartunut, imaluunniit tamanut saqqummiunneqartussanngorlugit Erhvervsstyrelsimut nassiunneqartunut imm. 1 aamma 2 assigisaanik atorneqassapput.

§ 16. Nalunaarut kukkuneq imaluunniit amigaateqarnera pissutigalugu nalunaarsorneqarsinnaanngippat, Erhvervsstyrelsi nalunaarsuinermut oqartussatut iluarsisuteqarnissamat piffissaliussamik aalajangersaasinnaavoq. Piffissaliussatut aalajangerneqartoq qaangiutsinnagu iluarsisuteqartoqanngippat, nalunaarsuinissaq itigartitsissutigineqassaaq.

Imm. 2. Nalunaarsuineq imm. 1 malillugu itigartitsissutigineqarpat, nalunaarsuisoqannginnissaa tamatumunngalu tunngavilersuutit pillugit nalunaaruteqartoq allakkatigut nalunaarfigineqassaaq.

§ 17. Nalunaarsuinissamat piumasaqaatit eqqortinneqarsimanerisa nalilernissaanut paasissutissat pisariaqartinneqartut Erhvervsstyrelsi nalunaarsuinermut oqartussatut piumasaqaatigisinnaavai.

Imm. 2. Maleruagassat kapitali manna malillugu aalajangersagaasut malillugit nalunaaruteqarnermi nalunaarsuinermilu, nalunaarsuinerup nalunaaruteqarnerulluunniit inatsisit malillugit pisimanera pillugu uppersaatinik nassiussisoqarnissaa Erhvervsstyrelsi nalunaarsuinermut oqartussatut nalunaarsuinermit nalunaaruteqarnermiilluunniit ukiut pingasut tikillugit piumasaqaatigisinnaavaa. Nalunaarsuinermut nalunaaruteqarnermulluunniit atatillugu aningaasat sumut atorneqarneranni inatsisinik malinnittoqarsimanera pillugu kukkunerisuisumit akuerisaasumit nalunaarummik nassiussisoqarnissaa Erhvervsstyrelsi nalunaarsuinermut oqartussatut pisuni immikkut ittuni tamatumunnga atatillugu piumasaqaatigisinnaavaa. Oqaaseqatigiit suilliit aappaallu malillugit piumasaqaatit eqqortinneqanngippata, pissutsit iluarsineqarnissaannut piffissaliussamik Erhvervsstyrelsi nalunaarsuinermut oqartussatut pisup iluarsiviginissaanut piffissaliussamik aalajangersaassaaq. Piffissaliussatut aalajangersagaasoq qaangiutsinnagu iluarsisoqanngippat, aningaasaateqarfiup §§ 115-117-imi maleruagassat malillugit pinngitsaaliissummik atorunnaarsinneqarnissaa Erhvervsstyrelsi pisariaqarpat sulissutigisinnaavaa.

Imm. 3. Peqqussummi matumani aalajangersakkanik imaluunniit peqqussut manna malillugu aalajangersakkanik imaluunniit malittarisassanik unioqquutitsisoqartillugu, pissutsit peqqussummut matumunnga imaluunniit peqqussut malillugu aalajangersakkanut imaluunniit malittarisassanut naapertuuttunngorteqqullugit Erhvervsstyrelsi nalunaarsuinermut oqartussatut siulersuisunut, pisortaanerit imaluunniit kukkunerisuisumut peqqussutigisinnaavaa.

§ 18. Aqutsisunut maanna siusinnerusukkullu ilaasortaasimasut aqqi, atorfiit najugaallu pillugit paasissutissat, Erhvervsstyrelsi qarasaasiaqarfiaqatigut qaqugukkulluunniit takuneqarsinnaassapput, Erhvervsstyrelsi allamik aalajangiinngippat. Tamanna aningaasaateqarfinnut inuussutissarsiornermik ingerlatsisunut sulit atuuttunut atorunnaarsitanullu atuuppoq.

Imm. 2. Inuup pineqartup suliffeqarfimmi Erhvervsstyrelsip qarasaasiaqarfiani nalunaarsugaasumi nalunaarsugaanerata uninneraniit ukiut qulit qaangiunneranni inuk pineqartoq pillugu imm. 1 malillugu paasissutissanik nutaanik ilaartuineq unissaq.

Nalunaarsuineq il.il. pillugit aalajangersakkat immikkut ittut

§ 19. Nalunaaruteqartoq peqqussut manna imaluunniit peqqussut manna malillugu aalajangersakkat malillugit nammineeurluni nalunaarsuippat, nalunaarsuinerit taamatut ittut nalunaarutininik nassiussinermut taarsiullugu atuutilissapput.

Imm. 2. Peqqussut manna malillugu pissutsit pinngitsoorani nalunaarsugassat nalunaarutiginnissaat nalunaarsorneqarnissaalluunniit pillugit maleruagassanik Erhvervsstyrelsi aalajangersaassaaq.

Imm. 3. Nalunaarsuinerit, uppersaataatitut allakkiat nalunaarutillu il.il. peqqussut manna malillugu Erhvervsstyrelsip qarasaasiaqarfiatigut tamanut saqqummiunneqartussat saqqummiunneqarnissaat pillugu maleruagassanik Erhvervsstyrelsi aalajangersaassaaq.

Imm. 4. Nalunaaruteqarnermut, pappialangortitsinermut il.il. nalunaarummut, uppersaataatitut allakkiat assilineqarnerinut, Erhvervsstyrelsip qarasaasiaqarfianik atuinnermut kiisalu kingusinaarluni akiliinermi akileeqqusissutinut akiliutit pillugit maleruagassanik Erhvervsstyrelsi aalajangersaasinnaavoq. Aammattaaq peqqussut manna malillugu allaffissornikkut ingerlatsinermut aningaasartuutit matussusernissaannut aningaasaateqarfiit ataasiakkaat akiliuteqartarnissaat pillugu maleruagassanik Erhvervsstyrelsi aalajangersaasinnaavoq.

§ 20. Paasissutissat, aningaasaateqarfinnut oqartussanit pigineqartut tamanut saqqummiunneqanginnissaat pillugu maleruagassanik inuussutissarsionermut ineriartortitsinermullu ministeri aalajangersaasinnaavoq.

§ 21. Arlaat isumaqarpat nalunaarsuineq imminermut ajoqutaasoq, nalunaarsuinerup peerneqarnissaanik apeqqut eqqartuussivinnit aalajangiiffigineqassaaq.

Imm. 2. Tamanna pillugu suliaq nalunaarsuinerup Erhvervsstyrelsip qarasaasiaqarfiatigut tamanut saqqummiunneqarneraniit kingusinnerpaamik qaammatit arfinillit qaangiunneranni aningaasaateqarfik aklerlalu suliaasiissutigineqassaaq. Eqqartuussutip allaganngortinneqarneranik eqqartuussivik Erhvervsstyrelsimut nalunaarsuinerinut oqartussaasumut nassiussissaaq, tamatumalu kingorna Erhvervsstyrelsip suliaq inerneru pillugu paasissutissat Erhvervsstyrelsip qarasaasiaqarfiatigut tamanut saqqummiutissallugit.

Piffissaliussamik naatsorsuineq

§ 22. Pisussaq erseqqinnerusumik taaneqartoq ullunik, sapaatit akunnerinik, qaammatinik ukiunilluunniit aalajangersimasumik amerlassusilinnik sioqqullugu iliuutsimik iliuuseqartoqarsinnaanera imaluunniit iliuuseqartoqartussaana pillugu peqqussummi matumani imaluunniit peqqussut manna malillugu aalajangersakkani aalajangersaasoqarsimappat, pisussap aqagumut pisussanngorneraniit iliuutsip iliuuserinissaanut piffissaliussaq naatsorsorneqassaaq.

Imm. 2. Iliuutsip iliuuserinissaanut piffissaliussaq sapaatip akunnerata naanerani, nalliuttuni, inatsisitaarfimmi, juulliaqqami ukiutoqqamiluunniit naappat, taanna sioqqullugu ulluinnarmi kingullermi iliuuseq kingusinnerpaamik iliuuserineqassaaq.

Imm. 3. Pisimasup erseqqinnerusumik taaneqartup pinerata kingorna ullut, sapaatit akunneri, qaammatit ukiulluunniit aalajangersimasumik amerlassusillit qaangiunneranni iliuuseqartoqarsinnaaneranik aalajangiisoqarsinnaaneranilluunniit peqqussummi matumani

imaluunniit peqqussut manna malillugu aalajangersakkani aalajangersaasoqarsimappat, iliuseqarnissamut aalajangiinissamulluunniit piffissaliussaq pisimasup pinerata aqaguanit naatsorsorneqassaaq. Piffissaliussap qaangiunnerata aqaguani aatsaat iliuseqartoqarsinnaavoq aalajangiisoqarluniluunniit.

§ 23. Pisimasup erseqqinnerusumik taaneqartup pinerata kingorna kingusinnerpaamik ullut, sapaatit akunneri, qaammatit ukiulluunniit qaangiutinnginneranni iliuseqartoqarnissaanik peqqussummi matumani imaluunniit peqqussut manna malillugu aalajangersakkani aalajangersaasoqarsimappat, iliuseqarnissamut piffissaliussaq pisimasup taassuma pinerata aqaguanit naatsorsorneqassaaq, tak. imm. 2-4.

Imm. 2. Piffissaliussaq, tak. imm. 1, sapaatit akunnerinut taaneqarsimappat, sapaatit akunnerata ulluani pisup piffigisaani piffissaliussaq naassaaq.

Imm. 3. Piffissaliussaq, tak. imm. 1, qaammatinut taaneqarsimappat, iliutsip iliuserinissaanut qaammatip ulluani pisup piffigisaani piffissaliussaq naassaaq. Pisimasup qaammatip ulluani kingullermi pisimappat, imaluunniit qaammatip ulluani piunngitsumi piffissaliussaq naappat, qaammatip qanoq sivistiginera apeqquaatinnagu piffissaliussaq qaammatip ulluani kingullermi tamatigut naassassaaq.

Imm. 4. Piffissaliussaq, tak. imm. 1, ukiunut taaneqarsimappat, ukiup ulluani pisup piffigisaani piffissaliussaq naassaaq.

Imm. 5. Piffissaliussaq sapaatit akunnerata naanerani, nalliuttuni, inatsisitaarfimmi, juulliaqqami ukiutoqqamiluunniit naappat, tamatuma kingorna kingusinnerpaamik ulluinnarmi siullermi iliuseqartoqassaaq.

Kapitali 4

Aningaasaateqarfinnut oqartussat

§ 24. Peqqussut manna malillugu aningaasaateqarfinnut oqartussaassuseq Erhvervsstyrelsimit isumagineqassaaq.

Imm. 2. Peqqussummik matuminnga, peqqussut manna malillugu aalajangersakkanik imaluunniit malittarisassanik unioqqutitsinermi, pissutsit peqqussummut matumunnga, peqqussut malillugu aalajangersakkanut malittarisassanulluunniit naapertuuttunngortinnissaat aningaasaateqarfinnut oqartussat aqutsisunut kukkunersiuismulluunniit peqqussutigisinnaavaat.

Imm. 3. Aningaasaateqarfinnut oqartussat paasissutissat suliassaminnik isumaginninnissamut pisariaqartitativik piunngitigisinnaavaat.

Misissueqqissaarneq

§ 25. Pissutsit erseqqinnerusumik taaneqartut aningaasaateqarfimmut inuussutissarsiornermik ingerlatsisumut, taassuma ingerlatsivianut imaluunniit ukiumoortumik nalunaarutaanut tunngasut misissueqqissaarfigineqarnissaat aningaasaateqarfinnut oqartussat aalajangersinnaavaat.

Imm. 2. Aningaasaateqarfinnut oqartussat aningaasaateqarfik sinnerlugu misissueqqissaartussamik ataatsimik arlalinnilluunniit toqqaassapput. Misissueqqissaarnermut aningaasartuutit aningaasaateqarfinnut oqartussanit akuersissutigineqassapput akilerallarneqassallutik, aningaasaateqarfimmi akilerneqassallutik.

Imm. 3. Paasissutissat aningaasaateqarfimmi aamma aningaasaateqarfik piginnittuulluni aningaasaateqarfiuppat, piginneqatigiiffissuarmik nalilersuinissamut pingaaruteqartutut isigineqartut pissarsiarinissaat misissueqqissaartut aqutsisunut piunngitigisinnaavaat.

Imm. 4. Misissueqqissaartut aningaasaateqarfinnut oqartussanut allakkatigut nalunaarusiussapput. Misissueqqissaartut aningaasarsiassaas aningaasaateqarfinnut oqartussanit aalajangersarneqassapput.

Kapitali 5

Pilersitsineq

Pilersitsisut

§ 26. Aningaasaateqarfik inuussutissarsiornermik ingerlatsisoq pilersitsisumit ataatsimit arlalinnilluunniit pilersinneqarsinnaavoq.

Imm. 2. Pilersitsisoq akiliisinnaajunnaarallarsimassanngilaq imaluunniit akiliisinnaajunnaarsimassanani.

Imm. 3. Pilersitsisoq inuuppat, inuk nammineersinnaassuseqassaaq aammalu nammineersinnaatitaaneq pillugu inatsit, kunngip peqqussutaatigut Kalaallit Nunaanni atuutsinneqalersoq malillugu pigisat tungaasigut siunnersorteqartitaassanani.

Imm. 4. Pilersitsisoq inatsisitigut pisinnaatitaasuullunilu pisussaataaasuuppat, pineqartoq pisinnaatitaaffeqalersinnaassaaq pisussaaffeqalersinnaassallunilu eqqartuussinernilu illuatungiuuttuusinnaassalluni.

Malittarisassat

§ 27. Aningaasaateqarfimmut inuussutissarsiornermik ingerlatsisumut malittarisassat pilersinneqassapput. Taakku imarissavaat

- 1) ateq, taamaattoqarpallu saniatigut aqqit,
- 2) pilersitsisoq,
- 3) siunertaq,
- 4) tunngaviusumik aningaasaatit amerlassusaas, qanorlu iliorluni akilerneqarsimanersut,
- 5) aningaasaateqarfik pilersitsineranut atatillugu naliliutinik allanik aningaasaanngitsunik saniatigut tigusaqassanersoq,
- 6) taamaattoqarpat immikkut pisinnaatitaaffiit ajunngitsorsiasalluunniit, pilersitsisunut allanulluunniit atugassiissutigineqartut,
- 7) siulersuisunut ilaasortat qassiuneri qanorlu toqqarneqartarnersut,
- 8) ukioq naatsorsuiffik, ukioq naatsorsuiffik siulleq ilanngullugu,
- 9) aningaasaateqarfimmik pilersitsinissamik aalajangernerup ulluanit allaanerusumik inatsisitigut atuuttussanngortitsisoqassappat, ulloq aalajangersimasoq suna aallarnerfigalugu pilersitsineq inatsisitigut atuutsitaalissanersoq, tak. § 29, imm. 3 aamma 4, aamma
- 10) sinneqartoortutinik pissamaatinillu atuineq.

Imm. 2. Uppernarsaatitut allakkiani malittarisassat innersuussutigineqarpata, taassumali pingaarnertut imaa malittarisassani issuarneqarsimanngippat, taanna kakkigunneqassaaq.

Imm. 3. Pissutsit imm. 1, nr. 3-mi aamma 10-mi taaneqartut pillugit najoqqutassanik nalinginnaasunik aalajangersaasoqarpat, taakku Erhvervsstyrelsimut, nalunaarsuineranut oqartussaasumut nassiunneqassapput.

§ 28. Malittarisassani aalajangersakkat, agguassinerimi ilaqutariinni aalajangersimasuni ilaqutaasut ilaannik imaluunniit ilaqutariinnik aalajangersimasunik salliutitsisut, piffissami pilersitsiffiusumi inuit inuusut qaangerlugit, taakkunungalu kinguaanngortussat suli inunngunngitsut tikillugit salliutitsineq killeqartinneqarpat, inatsisitigut sunniuteqassanngillat.

Imm. 2. Malittarisassani aalajangersakkanut, aalajangersimasumik atorfeqalernissamut imaluunniit allatigut ilaqutariinni aalajangersimasuni ilaqutaasut ilaannik imaluunniit ilaqutariinnik aalajangersimasunik salliutitsisunut imm. 1-imi aalajangersagaq assigisaanik atorneqassaaq, sulinermut aningaasarsiaqarnikkut aningaasaateqarfimmit imaluunniit suliffeqarfimmit aningaasaateqarfiup aalajangiisutut sunniuteqarfigisaanik aningaasanik tunineqartarneq ilanngullugu.

Pilersitsinermik nalunaarsuineq

§ 29. Aningaasaateqarfik inuussutissarsiornermik ingerlatsisoq nalunaarsorneqassaaq imaluunniit nalunaarsorneqarnissamut nalunaarutigineqassalluni, tak. § 12, imm. 1. Tunngaviusumik aningaasaatit malittarisassani aalajangersagaasut tamarmiisut akilerneqareertinnagit aamma siulersuisut kukkunersiuisorlu toqqarneqareertinnagit aningaasaateqarfik nalunaarsorneqassanngilaq.

Imm. 2. Pilersitsinissamut aalajangernerup ulluani imaluunniit ullumi kingusinnerusumi malittarisassani taaneqartumi pilersitsineq inatsisitigut sunniuteqalissaaq, taamaattoq tak. imm. 3 aamma 4.

Imm. 3. Tunngaviusumik aningaasaatit taamaallaat aningaasaviuppata, pilersitsineq malittarisassat ullulerneraniit qaammatinik 12-inik kingusinnerusumi inatsisitigut sunniuteqalersinneqarsinnaanngilaq.

Imm. 4. Aningaasaateqarfik pilersinneqarnerminut atatillugu aningaasaviunngitsunik nalilinnik allanik tigusaqassappat, pilersitsineq piffissamit aningaasaateqarfiup nalunaarsorneqarfianit imaluunniit nalunaarsorneqartussatut nalunaarutigineqarneranit kingusinnerusumi inatsisitigut sunniuteqalersinneqarsinnaanngilaq, tak. imm. 1.

Imm. 5. Aningaasaateqarfik pilersinneqarnerminut atatillugu suliffeqarfimmik pioreersumik tigusippat, imaluunniit suliffeqarfimmi allami piginneqatigiissutinik aalajangiisunik tigusippat, suliffeqarfimmi aningaasaliissutitut atorneqartumi imaluunniit piginneqatigiissutinut tunngasumi ukiumi naatsorsuiffiusumi attuuttumi naatsorsuutit eqqarsaatigalugit pilersitsineq ullormit siullermit sunniuteqalersinneqarsinnaavoq.

§ 30. Aningaasaateqarfik inuussutissarsiornermik ingerlatsisoq nalunaarsugaanngitsaq pisinnaatitaaffeqalersinnaanngilaq, pisussaaffeqalersinnaanngilaq pilersitsinerlu pillugu eqqartuussivimmut suliassiineq eqqaassanngikkaanni, eqqartuussinerni illuatungiliuttuusinnaanani. Aningaasaateqarfiup oqaaseq pilersinneqalersoq atermi ataanut ilannguttassavaa.

Imm. 2. Inatsisitigut sunniuteqalerfissaq ullormik aningaasaateqarfimmik pilersitsinissamik aalajangernermit kingusinnerusumik ullulerlugu aningaasaateqarfik pilersinneqarpat, tak. § 29, imm. 3 imaluunniit 4, ulloq inatsisitigut sunniuteqalerfissaq tikillugu aningaasaateqarfik sinnerlugu pisinnaatitaaffeqalertoqarsinnaanngilaq pisussaaffeqalertoqarsinnaanani.

Imm. 3. Pisussaaffimmut, aningaasaateqarfiup pilersinneqarnissaanik aalajangernerup kingorna, nalunaarsorneqarnerulli siorna aningaasaateqarfik sinnerlugu pisussaaffigineqalersunut, inuit pisussaaffimmik isumaqatigiissuteqartut imaluunniit tamatumunnga akisussaaqataasut, tamatumunnga nammaqatigiillutik akisussaasuussapput. Nalunaarsuisoqarneratigut aningaasaateqarfiup pisussaaffiit taakku pisussaaffigilissavai.

Kapitali 6

Aningaasaatit

§ 31. Aningaasaateqarfik inuussutissarsiornermik ingerlatsisoq minnerpaamik 300.000 kr.-inik tunngaviusumik aningaasaateqassaaq

Tunngaviusumik aningaasaatinut aningaasaviit atornagit nalilinnik allanik aningaasaliissuteqarneq

§ 32. Tunngaviusumik aningaasaatit tamakkiisumik ilaannakortumilluunniit aningaasaviit atornagit nalilinnik allanik akilerneqassappata, aningaasaliissutit aningaasaqarnikkut naleqartuussapput, suliaqarnissamut sullissinissamulluunniit pisussaaffiussanatik. Pilersitsisunit pisassarisat aningaasaliissutaasinnaangillat nangillugilluunniit tiguneqarsinnaanatik, pisassarisat qularnaveeqqusiinikkut qulakkeerneqarsimagaluarpataluunniit.

Imm. 2. Tunngaviusumik aningaasaatit tamakkiisumik ilaannakortumilluunniit aningaasaviit atornagit nalilinnik allanik akilerneqassappata, imaluunniit pilersitsinermut atatillugu nalillit taamatut ittut aningaasaateqarfiup nangillugit tigussappagit, pissutsit aningaasaliissutit imaluunniit nangillugu tiguserup nalilernissaannut pingaaruteqartut nassuiaatigineqassapput. Nalillit aningaasaliissutigineqartut imaluunniit nangillugit tiguneqartut ataasiakkaat allaaserineqarnerannik nassuiaat imaqassaaq, inuillu aningaasaliinermut imaluunniit nangillugit tigusermut isumaqatigiisummut ilaasut aqqi najugaqarfiilu taaneqassallutik.

§ 33. Aningaasaateqarfimmut nalilinnik allanik aningaasaliissuteqartoqarpat, imaluunniit aningaasaateqarfiup nalillit allat aningaasaviunngitsut nangillugit tigussappagit, pilersitsinermut atatillugu naliliinermut nalunaarusiaq suliarineqassaaq. Naliliinermut nalunaarusiap imarissavai

- 1) aningaasaliissutit ataasiakkaat tamaasa pillugit allaaserinninneq,
- 2) nalilersuinermi periuseq atorneqartoq pillugu paasisutissat, aamma
- 3) aningaasaqarnikkut nalingata naliliunneqartup minnerpaamik tunngaviusumik aningaasaatinik naleqateqarnera pillugu nalunaarut.

Imm. 2. Naliliinermut nalunaarut naliliisartutut ilisimasalimmit arlaannaannulluunniit attuumassuteqanngitsumit imaluunniit taamaattunit arlalinnit suliarineqassaaq. Pilersitsisut kukkunerisuisunik akuerisaasunik naliliisartutut toqqaasinnaapput. Piffimmi aningaasaateqarfiup angerlarsimaffigisassaani pigisanik agguasarnermut eqqartuussivik naliliisartunik pisuni immikkut ittuni toqqaasinnaavoq. Misissuinerit naliliisartut pisariaqartutut isigisatik ingerlatissavaat, suliasamillu isumaginissaannut paasisutissat ikiuunnerlu pisariaqartutut isigisatik pilersitsisunit aqutsisunillu piumasaaqatigisinnaallugit.

Imm. 3. Aalajangiineq sapaatit akunnerinik sisamanik sioqqullugu nalilersuisoqarsimassanngilaq. Piffissaliussaq qaangerneqarpat, nutaamik nalilersuisoqassaaq.

Imm. 4. Pilersinneqarnermut atatillugu aningaasaateqarfiup suliffeqarfik pioreersoq nangillugu tiguppagu, nalilersuinermut nalunaarusiaq aamma aningaasaateqarfik pillugu ammaanermi oqimaaqatigiissitsinermik kunngip peqqussutaatigut Kalaallit Nunaanni atuutilersinneqartumik imaqassaaq. Kukkunerisuisoqarsimanera pillugu kukkunerisuisup nalunaarutaanik ammaanermi oqimaaqatigiissitsineq ilanngussiffigineqassaaq.

§ 34. Nalilersuinermut nalunaarusiamik suliarinnittoqarnissaanik § 33, imm. 1 malillugu piumasaaqat, makkunani aningaasaliissuteqarnermi atuutinngilaq:

- 1) Naliliutit pisussaaffiillu, ukioq naatsorsuiffusoq siulia pillugu ukiumoortumik naatsorsuutini imaluunniit suliffeqarfissuarmut naatsorsuutini ataasiakkaarlugit saqqummiunneqartut, naatsorsuutillu ukiumoortumik naatsorsuutit pillugit inatsit, kunngip peqqussutaatigut Kalaallit Nunaanni atuutsinneqalersoq, imaluunniit nunat tamat akornanni

naatsorsuuserinermut pitsaassusiliussat, tak. nunat tamat akornanni naatsorsuuserinermut pitsaassusiliussat, suliffeqarfinnut aningaasaqarnermik suliaqartunut inatsisikkut imaluunniit inatsisit malillugit aalajangersagaasut atorneqarnissaat pillugu Europa-Parlamentip aamma Europa-Rådip peqqussutaat nr. 1606/2002, 19. juli 2002-meersoq malillugit suliarineqarsimappata, imaluunniit suliffeqarfimmut nunami allameersumut naatsorsuutinniippata, naatsorsuutillu Europa-Parlamentip aamma Europa-Rådip peqqussutaat 2013/34/EU kingusinnerusukkut allannguutitalik malillugu suliarineqarsimappata kukkunersiuismillu oqaaseqarfigineqarsimallutik kiisalu naliliutigineqartoq pisussaaffilluunniit ukiumi naatsorsuiffiusumi siuliani ukiumoortumik naatsorsuutini imaluunniit piginneqatigiiffissuup naatsorsuutaani ullormi pineqartumi nalinga malillugu annertussusilerneqarsimappata.

2) Pappialat nalillit imaluunniit aningaasanik niuerfinni sakkussat, malittarisassat atsiorneqarnerat sapaatit akunnerinik sisamanik sioqqullugu tunitsivimmi malittarisassaqartumi arlaqartuniluunniit niuerutigineqarsimasut, agguaqatigiissillugu kursimut nalilerlugit ilanngunneqartut. Agguaqatigiissilluguli kursi taanna pissutsinit immikkorluinnaq ittunit sunnerneqarsimasoq, imaluunniit maanna nalinginik takutitsinngitsutut isumaqarfigineqarsinnaasoq siulersuisut nalilerpassuk, § 33, imm. 1 malillugu nalilersuinermt nalunaarusiaq suliarineqassaaq.

Imm. 2. Aningaasaliissutit imm. 1-imut ilaatinneqartut aningaasaateqarfimmut taassumaluunniit akiligassaqarfiinut ajoqutaannginnissaat siulersuisut akisussaaffigaat, siulersuisullu nalunaarummik tulliuttunik imaqtartumik suliaqassapput

- 1) naliliutip taassumalu nalinganik allaaserinninneq,
- 2) nalilersuinermi periuseq atorneqartoq pillugu paasissutissat,
- 3) naliliutit taaneqartut minnerpaamik tunngaviusumik aningaasaatit naleqateqarnerat pillugu oqaaseqaat, aamma
- 4) pissutsinik nutaanik, aallaqqaammut nalilersuinermt pingaaruteqartunik, pilertoqarsimannginnera pillugu oqaaseqaat.

Imm. 3. Aningaasaateqarfiup pilersinneqarnerata nalunaarsorneqarnerata imaluunniit nalunaarsorneqartussatut nalunaarutigineqarnerata peqatigisaanik, tak. § 12, imm. 1, siulersuisut imm. 2 malillugu nalunaarut Erhvervsstyrelsimut, nalunaarsuinermt oqartussaasumut nassiuutissavaat.

Aningaasaatit amerlisinnerat

§ 35. Siulersuisut aalajangernerisigut tunngaviusumik aningaasaatit amerlineqarsinnaapput

- 1) pissamaatinik imaluunniit aningaasaateqarfiup ukiumoortumik naatsorsuutai kingullerpaat kukkunersiugaasut malillugit sinneqartoorutininuussilluni,
- 2) sinneqartoorutininuussilluni imaluunniit pissamaatinik pituttugaanngitsunik, piffissap kingullermik ukiumoortumik naatsorsuutininuussilluni saqqummiussiffigisap kingorna pilersimasunik nuussilluni, aningaasat agguanneqarsimanngippata, atorneqarsimanngippata imaluunniit pituttugaanngippata, imaluunniit
- 3) kingornussiluni, tunissutisilluni assigisaanilluunniit tapiiffigineqarluni, tunngaviusumik aningaasaatit amerlinissaannut aningaasaateqarfiup tigusimasaasigut.

Imm. 2. Imm. 1 malillugu amerlisitsinerup malitsigisaanik malittarisassanik allannguinerit pisariaqartut siulersuisut suliarissavaat.

Imm. 3. Aningaasaviit atornagit nalilinnik allanik atuilluni aningaasaliissuteqarnikkut aningaasaatinik amerlisitsinermt, §§ 32-34 assigisaanik atorneqassapput. Pisunili taamatut ittuni suliffeqarfimmut tigunneqartumut nangillugu tigusinermt oqimaaqatigiissitsinertut, taamaattoqassappat § 33, imm. 4 malillugu oqimaaqatigiissitsineq suliarineqassaaq.

§ 36. Aningaasaatinik amerlisitsineq pissamaatinik sinneqartoorutinilluunniit nuussinissamik aalajangernermiit imaluunniit aningaasat amerlisitsissutaasut akilerneqarneranniit kingusinnerpaamik sapaatit akunnerisa tallimat kingorna Erhvervsstyrelsen qarasaasiaqarfiani nalunaarsorneqarsimassaaq imaluunniit nalunaarsorneqarnissamat nalunaarutigineqarsimassalluni. Aningaasaatinik amerlisitsineq nuussisoqareertinnagu akiliisoqareertinnaguluunniit nalunaarsorneqarsinnaanngilaq.

Imm. 2. Nalunaarsorneqarnissaaq itigartitsissutigineqarpat, aningaasaatit amerlisinnissaannik aalajangerneq atorunnaassaaq. Aalajangernerup kingorna kingusinnerpaamik qaammatit aqqaneq marluk qaangiunneranni nalunaarsuisoqarsimanngippat nalunaarsorneqarnissamulluunniit nalunaaruteqartoqarsimanani, aalajangerneq aamma atorunnaassaaq.

Kapitali 7

Aqutsisut il.il.

Aqutsisutut sulineq siulersuisullu suliaasaat pillugit aalajangersakkat nalinginnaasut

§ 37. Aningaasaateqarfik inuussutissarsiornermik ingerlatsisoq siulersuisunit aqunneqassaaq, siulersuisullu siulersuisunut ilaasortat § 64, imm. 1-imi oqaaseqatigiit siulliit malillugit qinerneqartut qaavatiqut pingasunik ilaasortaqaassallutik.

Imm. 2. Siulersuisut qullersanik atorfinitsisisinnaapput, pisortamik ataatsimik pisortanilluunniit arlalinnik inuttaqartunik. Siulersuisut qullersallu aqutsisuupput.

Imm. 3. Siulersuisuni ilaasortat amerlanerussuteqartut aningaasaateqarfimmi pisortatut atorfeqartuussanngillat. Pisortaq siulersuisunut siulittaasuusinnaanngilaq siulittaasulluunniit tullerisinnaanagu.

Imm. 4. Aningaasaateqarfiup suliffeqarfiutaani imaluunniit suliffeqarfimmi aningaasaateqarfiup piginngisaani, kisiannili suliffeqarfiup ingerlatsinikkut aningaasaqarnikkullu aqunneqarneranut aningaasaateqarfiup suliffeqarfiulluunniit pigisaata annertuumik sunniuteqarfigisaani aqutsisut taamaaqataanilluunniit aalajangiisartut aqutsisunullu ilaasortat taamaaqataanilluunniit aalajangiisartut, aningaasaateqarfiup siulersuisunut ilaasortanik toqqaqqusaanngillat.

Imm. 5. Siulersuisunut siulittaasoq imaluunniit siulittaasup tullia suliffeqarfimmi pigisami, suliffeqarfimmiluunniit aningaasaateqarfiup piginngisaani, kisiannili suliffeqarfiup ingerlatsinikkut aningaasaqarnikkullu aqunneqarneranut aningaasaateqarfiup annertuumik sunniuteqarfigisaani pisortaassanngilaq, aningaasaateqarfinnut oqartussat qaqutigorluinnaq pisartumik tamatumunnga akuersinngippata.

§ 38. Siulersuisut taamaallaat aningaasaateqarfiup siunertai soqutigisaalu sulissutigissavaat. Pingaarnertigut periusissatigullu aqutsinerup aningaasaateqarfiullu suliaasa illersorneqarsinnaasumik aqqissugaanerisa qulakkeernerisa saniatigut, nakkutigissavaat

- 1) naatsorsuutininut allattuinerup naatsorsuutinillu saqqummiussinerup aningaasaateqarfiup atugaanut naleqqiullugu naammaginartuunissaat,
- 2) aarlerinartunik aqutsinerup suliffeqarfiullu iluani nakkutilliinermut suleriaatsit pisariaqartinneqartut pilersinneqarsimanissaat,
- 3) aningaasaateqarfiup aningaasaqarnikkut inissisimanera pillugu siulersuisut pisariaqartitamik nalunaarusiorfigineqartarnissaat,
- 4) qullersat suliaminnik pissusissaattut aamma siulersuisut najoqqutassiaat malillugit suliarinninnissaat aamma

5) aningaasatigut upalungaarsimanerup qaqugukkulluunniit illersorneqarsinnaanissaa, aningaasaateqarfiup maanna siunissamilu akiligassaasa akilerneqartussanngornerat ilutigalugu akilernissaannut aningaasat tigorianaat naammannissaat ilanngullugu, taamaasilluni aningaasaqarnikkut inissisimanerup qaqugukkulluunniit nalilersortarnissaanut siulersuisut pisussaaffeqarput, aningaasatigullu upalungaarsimanerup atuuttup illersorneqarsinnaanissaa qulakkeerlugu.

Imm. 2. Aningaasaateqarfinni siulersuisut qullersanik atorfinitsitsiffiginngisaanni, suliassat imm. 1-imi taaneqartut saniatigut, ulluinnarni aqutsineq siulersuisut isumagissavaat.

§ 39. Aqutsisunut ilaasortat nammineersinnaassuseqassapput aammalu nammineersinnaatitaaneq pillugu inatsit, kunngip peqqussutaatigut Kalaallit Nunaanni atuutsinneqalersoq malillugu pigisat tungaasigut siunnersorteqartitaassanatik.

Pilersitsisup siulersuisuni sinniisuutitaqarnera pillugu immikkut aalajangersakkat

§ 40. Pilersitsisoq, taassuma uia/nulia aalajangersimasumilluunniit inooqataa, imaluunniit inuit inunnut pineqartunut siulitut kingulitulluunniit imaluunniit taakkununga ningaatut, imaluunniit qatanngutitut qanitsigalugit ilaqutaasut, aningaasaateqarfinnut oqartussat akuerseqqaartinnagit siulersuisuni amerlanerussuteqarsinnaanngillat.

Imm. 2. Aningaasaateqarfik inuussutissarsornermik ingerlatsisoq suliffeqarfimmit pilersinneqarpat, inuk suliffeqarfimmut piginnittuussutsit taasisinnaassutsilluunniit affai sinnerlugit piginnittoq, aningaasaateqarfinnut oqartussat akuersisimatinnagit inuit imm. 1-imi taaneqartut qanitsigisumik attuumassuteqarfigisani peqatigalugit siulersuisuni amerlanerussuteqataasinnaanngilaq. Suliffeqarfimmi pilersinneqartumi aqutsisut aningaasaateqarfinnut oqartussat akuersisimatinnagit, inuit imm. 1-imi taaneqartut aqutsisunut ilaasortanut pineqartunut attuumassuteqartut peqatigalugit siulersuisunit assigisaanik amerlanerussuteqarsinnaanngillat.

Suiaassutsimut tungasut apeqputaatillugit sinniisuutitaqartarnek

§ 41. Aningaasaateqarfinni inuussutissarsiornermik ingerlatsuni nunami EU/EØS-imut ilaasortani tunitsivinni maleruagassaqartitaasuni niuerutaasinnaasunik akiitsunut sakkusaatilinni imaluunniit pappialanik niuerutaasinnaasunik allanik peqartuni, aningaasaateqarfinnilu inuussutissarsiornermik ingerlatsisuni angisuuni, tak. imm. 2, siulersuisut suliassaraat

- 1) siulersuisuni suaassutsit ikinnerussuteqartut amerlinissaannut anguniakkat kisitsisinnngortinnerannik suliaqarlutik aamma
- 2) aningaasaateqarfiup aqutsisuini allani assigiinngitsunik qaffasissuseqartuni suaassutsit ikinnerussuteqartut amerliniarlugit anguniakkanik suliaqarlutik, taamaattoq tak. imm. 5 aamma 6.

Imm. 2. Aningaasaateqarfissuit inuussutissarsiornermik ingerlatsisut aningaasaateqarfiupput ukiuni naatsorsuiffiusuni marlunni imminnut malittuni tungaviit pineqartut ilaannik marlunnik qaangiisut:

- 1) Oqimaaqatigiissisinerup katinnera 156 mio. kr.-nik annertussuseqartoq,
- 2) kaaviiartitat aningaasartuutit ilanngaatigereerlugit 313 mio. kr.-inik annertussuseqartoq aamma
- 3) piffissaq suliffissaritataq tamaat sulisut agguaqatigiissillugu 250-inik amerlassuseqartut.

Imm. 3. Imm. 2-mi annertussutsit naatsorsorneranni ukiumoortumik naatsorsuutit pillugit inatsimmi, kunngip peqqussutaatigut Kalaallit Nunaanni atuutsinneqalersumi § 7, imm. 3 aamma 4 atorneqassapput.

Imm. 4. Aningaasaateqarfinnut piginnittunut, piginneqatigiiffissuarmut naatsorsuutininik suliaqartartunut imaluunniit suliarinnitsitsisartunut, imm. 2-mi naatsorsuineq piginneqatigiiffissuarmut tunngatillugu suliarineqassaaq.

Imm. 5. Aningaasaateqarfinnut piginnittunut, piginneqatigiiffissuarmut naatsorsuutininik suliaqartartunut, piginneqatigiiffissuaq ataatsimut isigalugu imm. 1 malillugu anguniakkat kisitsisinnngortinnerannik suliaqarnissaq anguniakkanillu suliaqarnissaq naammappoq.

Imm. 6. Aningaasaateqarfiit inuussutissarsiornermik ingerlatsisut, ukiumi naatsorsuiffiusumi kingullerpaami 50-it inorlugit sulisoqarsimasut, aningaasaateqarfiup aqutsisuinut assigiinngitsunik qaffasissuseqartunut suaassutsit ikinnerussuteqartut amerlisinniarlugit anguniakkanik suliaqartariaqanngillat, tak. imm. 1, nr. 2.

Qullersat suliaasaat

§ 42. Aningaasaateqarfinni inuussutissarsiornermik ingerlatsisuni qullersanik atorfnititsisoqarsimatillugu, qullersat ulluinnarni aqutsineq isumagissavaat, tamatumalu ilaattut aningaasaateqarfiup siunertai soqutigisaalu isumagissallugit. Najooqutassat innersuutillu siulersuisuneersut qullersat malissavaat. Aalajangiinerit aningaasaateqarfiup atugaanut naleqqiullugu nalinginnaanngitsutut pissuseqartut imaluunniit annertuumik pingaaruteqartut ulluinnarni aqutsinermut ilaangillat. Aatsaat siulersuisunit immikkut ittumik piginnaatitaanikkut qullersat taamatut pisoqartillugu aalajangiisinnaapput, siulersuisut aalajangiinissaasa utaqqinissaat aningaasaateqarfinnut annertuumik ajoqutaasussaanaera eqqaassanngikkaanni. Taamatut pisoqartillugu, siulersuisut aalajangiussaq pillugu piaarnerpaamik ilisimatinneqassapput.

Imm. 2. Naatsorsuutininut allattuinerup tamanna pillugu inatsisini maleruagassat malillugit pinissaa, aningaasaatinillu ingerlatsinerup toqqissisimanartumik ingerlanneqarnissaa pisortaanerit qulakkiissavaat.

Imm. 3. Aningaasatigut upalungaarsimanerup qaqugukkulluunniit illersorneqarsinnaanissaa qullersat tamatuma saniatigut qulakkiissavaat, aningaasaateqarfiup maanna siunissamilu akiligassaasa akilernerqartussanngornerat ilutigalugu akilernissaannut aningaasat tigorianaanaat naammannissaat ilanngullugu, taamaasilluni aningaasaqarnikkut inissisimanerup qaqugukkulluunniit nalilersortarnissaanut pisortaanerit pisussaaffeqarput, aningaasatigullu upalungaarsimanerup atuuttup illersorneqarsinnaanissaa qulakkeerlugu.

Imm. 4. Siulersuisut pisuni ataasiakkaani allatut aalajangiinngippata, pisortaq siulersuisut ataatsimiinneranni najuunnissamut oqaaseqarnissamullu pisinnaatitaaffeqarpoq.

Ingerlatsisooq

§ 43. Ingerlatsinerimi suliaasaat aalajangersimasut suliarinissaannut siulersuisut ingerlatsisumut isumaqatigiissuteqarsinnaapput. Ingerlatsisumut isumaqatigiissuteqartoqarsimagaluarpalluunniit, aningaasaateqarfiup ulluinnarni ingerlanneranut aqutsisut akisussaapput.

Aqutsisunut ilaasortat tunuarnerat

§ 44. Siulersuisunut ilaasortaq siulersuisunit qaqugukkulluunniit tunuarsinnaavoq.

Imm. 2. Siulersuisunut ilaasortaq akiliisinnaajunnaartutut suliarineqaruni, siulersuisunit tunuassaaq.

Imm. 3. Siulersuisunut ilaasortaq, pineqartup siulersuisunut ilaasortajuarnissamut ataqqinassuseerunneranik kinguneqartumik iliuuseqarnermut pisuutitaasoq, siulersuisunit tunuassaaq.

Imm. 4. Siulersuisunut ilaasortaq, sivisuumik napparsimanini imaluunniit allatigut sanngiillinini pissutigalugu siulersuisunut ilaasortatut sulisinnaangitsutut paasinarsisoq, imaluunniit piukkunnangitsutut paasineqartoq, siulersuisunit tunuassaaq.

§ 45. Siulersuisunut ilaasortaq imaluunniit pisortaq, § 39-mi piumasaqaatinik eqqortitsinngitsoq aningaasaateqarfinnut oqartussat tunuartissinnaavaat. Aammattaaq siulersuisunut ilaasortaq, pilersitsinermi uppersaatitit allakkiami piumasaqaatinik imaluunniit malittarisassanik eqqortitsinngitsoq, imaluunniit § 44, imm. 2-4-mi maleruagassat malillugit siulersuisunit tunuartussaasoq, aningaasaateqarfinnut oqartussat tunuartissinnaavaat.

§ 46. Pisuni immikkut ittuni, pisortamik soraarsitsinissaq aningaasaateqarfinnut oqartussat siulersuisunut inassutigisinnaavaat, aningaasaateqarfiup ulluinnarni aqunneqarnerata isumaginissaanut piumasaqaatinik pineqartoq erseqqissumik eqqortitsinngippat.

§ 47. Siulersuisunut ilaasortamik tunuartoqartillugu, siulersuisunut ilaasortaq nutaaq malittassat malillugit toqqarneqartassaaq.

Imm. 2. Siulersuisunut ilaasortamik malittarisassat naapertorlugit toqqaasoqanngippat, aningaasaateqarfinnut oqartussat toqqaassapput.

Sinniisussat

§ 48. Siulersuisuni ilaasortat pillugit peqqussummi matumani aalajangersakkat, taakku sinniisussaannut assigisaanik atorneqassapput.

Aqutsisunut ilaasortanik aningaasarsiaqartitsineq

§ 49. Aqutsisunut ilaasortanut aningaasarsiat suliap qanoq ittuunera suliallu annertussusaa malillugit nalinginnaasutut isigineqartut aamma aningaasaateqarfiup inuussutissarsiornermik ingerlatsisup piginneqatigiiffissuullu piginnittup aningaasaqarnikkut inissisisimanerannut naleqqiullugu illersorneqarsinnaasutut isigisariaqartut qaangissanngilaat.

Imm. 2. Siulersuisunut aningaasarsiaritit annertuallaartutut isigineqartut aningaasaateqarfinnut oqartussanit annikillisinneqarsinnaapput, tak. imm. 1.

Suleriaatsimut malittarisassat

§ 50. Suleriaatsimut malittarisassatigut siulersuisut suliassaasa sularinerannut aalajangersakkat erseqqinnerusut siulersuisut aalajangersassavaat.

Imm. 2. Siulersuisut suleriaatsimut malittarisassanik ilusiliineranni aningaasaateqarfiup suliai pisariaqartitaalu aallaavigineqassapput. Inissitsiterneq, sultanik agguataarineq, qullersanik nakkutiginninneq, naatsorsuutitut, protokolinit il.il. allattuineq, allakkatigut elektronikkilu atorlugu ataatsimiinnerit, nipangiussisussaataaneq, sinniisussat, naatsorsuutitut nakkutilliineq, kukkunerisuisut oqaaseqaataannut atsiorneq kiisalu kukkunerisuiunermut tunngavissat pisariaqartinneqartut atuunnerisa qulakkeernerat pillugu aalajangersakkanik suleriaatsimut malittarisassat imaqassanersut, siulersuisut tamatumunnga atatillugu immikkut eqqarsaatigisariaqarpaat.

Suliamut akuusinnaatitaannginneq

§ 51. Aqutsisunut ilaasortaq aningaasaateqarfiup inuussutissarsiornermik ingerlatsisup pineqartullu nammineq akornanni isumaqatigiissutit pillugit apeqqutit, pineqartoq nammineq

akerleralugu eqqartuussivimmuq suliassiissutit imaluunniit aningaasaateqarfiup inuullu allap akornanni isumaqatigiissutinut tunngasut imaluunniit inuk alla akerleralugu eqqartuussivimmuq suliakkiissutit suliarineqarneranni peqataaqqusaanngilaq, pineqartoq aningaasaateqarfiup soqutigisaanut akerliusunik tamatumunnga annertuumik soqutigisaqarpat.

Siulersuisut ataatsimiinnerisa ingerlanneqartarnerat

§ 52. Siulersuisut siulittaasortik namminneq qinissavaat. Taasinerit amerlaqatigiitsillugit qinersineq makitsinikkut aalajangiivigineqassaaq.

Imm. 2. Ataatsimiittoqarnissaa pisariaqartillugu siulersuisut ataatsimiittarnissaat siulittaasup isumagissavaa, siulersuisunullu ilaasortat tamavimmik aggersarneqarnissaat nakkutigissallugu.

Imm. 3. Siulersuisunut siulittaasup, suliassanik siulittaasutut sulinermut ilaanngitsunik aningaasaateqarfimmuq sullississanngilaq. Tamatumunngali immikkut ittumik pisariaqartitsisoqartillugu, suliassat siulersuinit qinnuigineqarluni suliareqquneqartut siulersuisunullu sullississutaasut siulersuisunut siulittaasup suliarisinnaavai.

§ 53. Siulersuisunut ilaasortanit tamarmiusunit affai sinnerlugit najuuppata, siulersuisut aalajangiisinnaatitaapput, amerlanerunissaat malittarisassat malillugit piumasagaataanngippat. Suliali suliarineqarneranut peqataanissamut siulersuisuni ilaasortat tamarluinnarmik periarfissaqarsimatinnagit aalajangiisoqarsinnaanngilaq.

Imm. 2. Siulersuisunut ilaasortaq najuussinnaanngippat, sinniisussamillu qinersisoqarsimappat, najuussinnaannginneq atuukkallartillugu sinniisussaq ilaasortap inissaani peqataasinnaatitaassaaq. Siulersuini allamik aalajangiisoqarsimanngippat malittarisassaniluunniit allamik aalajangersaasoqarsimanani, siulersuisuni ilaasortaq sinniisussamik aggersaanermut taarsiullugu siulersuisunut ilaasortamut allamut piginnaatitsissamik pisuni ataasiakkaani tunniussisinnaavoq, tamanna oqallinnissamut qulequtaq eqqarsaatigalugu toqqissisimanarpat.

Imm. 3. Suliat siulersuisunit suliarineqartut, malittarisassat malillugit immikkut amerlanerussuteqartoqarnissaa piumasagaatigineqanngippat, nalinginnaasumik amerlanerussuteqarnikkut aalajangerneqartassapput. Taasinerit naligiitsillugit, siulittaasup taasinerata, siulittaasullu peqannginnerani siulittaasup tulliata taasinerata aalajangiisuunissaat malittarisassani aalajangerneqarsinnaavoq.

Imm. 4. Siulersuisuni isumaqatigiinniarnit pillugit protokolimut allattuisoqassaaq, taannalu siulersuisunut ilaasortanit najuuttunit tamani atsiorneqassalluni. Aqutsisunut ilaasortap aalajangiinnermut isumaqataanngitsup, isummami protokolimut allatsinnissaa pisinnaatitaaffigaa.

§ 54. Ukiumoortumik naatsorsuutit il.il. kukkunerisuiisumit oqaaseqarfigineqartut suliarineqarneranni, kukkunerisuiisoq siulersuisut ataatsimiinneranni peqataanissamut pisinnaatitaaffeqarpoq. Aqutsisuni ilaasortap ataasiinnaalluunniit tamanna qinnuteqaatigippagu, kukkunerisuiisoq siulersuisut ataatsimiinneranni peqataanissamut pisussaaffeqarpoq.

Imm. 2. Kukkunerisuiisup oqaaseqaataa, kukkunerisuiisut pillugit inatsit malillugu kukkunerisuiisup suliarisussaavaa taannalu siulersuisut ataatsimiinnerini tamani saqqummiunneqartassaaq. Protokolimut ilanngunneqartut tamarluinnarmik siulersuisunut ilaasortanit tamarmiusunit atsiorneqartassapput.

§ 55. Aqutsisunut ilaasortap ataatsip, kukkunersuiisup, aningaasaateqarfinnut oqartussat imaluunniit Erhvervsstyrelsen nalunaarsuineranut oqartussatut siulersuisut aggersarneqarnissaat piumasarisinnaavaa.

Siulersuisut allakkatigut elektronikkilu atorlugu ataatsimiinneri

§ 56. Siulersuisut ataatsimiinneri allakkatigut ingerlanneqarsinnaapput, tamanna siulersuisut suliaasaannut naapertuussinnaatillugu. Aqutsisunili ilaasortap ataatsip siulersuisut oqaasiinnartigut oqaloqatigiinnissaat piumasarisinnaavaa. Siulersuisut ataatsimiinnerat pillugu peqqussummi matumani aalajangersakkat, siulersuisut allakkatigut ataatsimiinnerinut assigisaanik atuutissapput.

Imm. 2. Siulersuisuni ataatsimiinnerit elektronikkimik attaveqaatit atorlugit ingerlanneqarsinnaapput, tamanna siulersuisut suliaasaannut naapertuussinnaatillugu. Aqutsisunili ilaasortap ataatsip siulersuisut oqaasiinnartigut oqaloqatigiinnissaat piumasarisinnaavaa. Siulersuisut ataatsimiinnerat pillugu aamma elektronik atorlugu attaveqatigiinneq pillugu peqqussummi matumani aalajangersakkat, siulersuisut elektronik atorlugu ataatsimiinnerinut ataatsimiinnermullu atatillugu attaveqatigiinnermut assigisaanik atorveqassapput.

Imm. 3. Siulersuisut elektronik atorlugu ataatsimiinnerinut atugassatut, uppersaatitut allakkianik pappialannortitanik peqqussummanna malillugu nassiusseq saqqummiussinerluunniit atornagu, elektronik atorlugu paarlaasseqatigiittarnerup atorveqarnissaa siulersuisut aalajangersinnaavaat.

Nipangiussisusaatitaaneq

§ 57. Aqutsisunut ilaasortat, naliliisartut misissueqqissaartartullu kiisalu taakku ikiortaasa sinnisaasalu, suliaaminnik suliarinninnerminni ilisimalikkatik pisusaatitaanatik allanut ingerlateqqissanngilaat.

Paasissutissanik il.il. kukkunersuiisumut nalilersueqqissaartartumulluunniit tunniussineq

§ 58. Paasissutissat aningaasaateqarfimmik, aningaasaateqarfillu piginnittuulluni aningaasaateqarfiuppat, taassuma piginneqatigiiffissuanik naliliinermut pingaaruteqartutut isigineqartut, aqutsisunut ilaasortat kukkunersuiisumut misissueqqissaartumulluunniit kimulluunniit, aningaasaateqarfimmi inuussutissarsiornermik ingerlatsisumi pissutsit pillugit nalunaaruteqartussamat tunniutissavai, tak. § 6.

Imm. 2. Kukkunersuiisooq misissueqqissaartorluunniit kinaluunniit, aningaasaateqarfimmi pissutsinik nalunaaruteqartussaq, misissuinernik taassuma pisariaqartutut isigisaanik ingerlataqarnissamat aqutsisunut ilaasortat aqutissaqartissavaat, kukkunersuiisullu imaluunniit misissueqqissaartup paasissutissanik ikiorneqarnissamillu pineqartup suliaminik suliarinninnissamat pisariaqartutut isigisaanik tunineqarnissaa qulakkiissallugu.

Ukiumoortunik naatsorsuutit ataatsimiissutiginerat

§ 59. Ukiumoortunik naatsorsuutit ukiumoortunik ataatsimiissutigineqartassapput, ukiumoortunik nalunaarutip akuersissutigineqarnissaa aamma ukiumoortunik nalunaarut akuersissutigineqartoq malillugu sinneqartoortit atorveqarnissaat imaluunniit amigartoortit matussuserneqarnissaat siulersuisut tamatumani aalajangiiffigissallugu.

Imm. 2. Ukiumoortunik naatsorsuutit ataatsimiissutiginerannik imm. 1-imi taaneqartumi peqataanissamat kukkunersuiisooq pisusaatitaavoq. Kukkunersuiisulli peqataanissaa

pisariaqanngitsoq siulersuisuni ilaasortat tamarluinnarmik isumaqatigiissutigippassuk, kukkunersiuisorlu tamatumunnga isumaqataappat, kukkunersiuisoq peqataanissamut pisussaaffeqanngilaq. Aalajangerneq siulersuisut protokolianni takuneqarsinnaassaaq.

Aningaasaateqarfimmik aqutsilluarnermut kaammattuutit

§ 60. Aningaasaateqarfimmik aqutsilluarnermut kaammattuutit, Aningaasaateqarfimmik Aqutsilluarnermut Ataatsimiititaliamit suliarineqartut qanoq isumaqarfiginerlugit siulersuisut nassuiaassavaat. Aningaasaateqarfiup kaammattuutit ataasiakkaat malinnerai, kaammattuummillu ataatsimik kaammattuutinilluunniit arlalinnik avaqquttarnerai, taamaappallu sorliit avaqqunneqartarnersut, siulersuisut nassuiaamminni oqaatigissavaat. Siulersuisut kaammattuummik ataatsimik avaqutaqartarunik, tamatumunnga pissutaasut, taarsiullugulu qanoq aaqqissuussisimanertik siulersuisut nassuiaatigissavaat.

Imm. 2. Kaammattuutinut Aningaasaateqarfimmik Aqutsilluarnermut Ataatsimiititaliap suliaanut siulersuisut qanoq isummersuuteqarnerat pillugu nassuiaateqarnissamut aningaasaateqarfinnut oqartussat siulersuisut peqqusinnaavai, tak. imm. 1.

Immikkut ittumik atuinerit

§ 61. Taamaallaat aningaasaateqarfinnut oqartussat akuersissuteqarnerisigut siulersuisut malittarisassat malinneqarsinnaannginnerannik aarlerinartitsilersinnaasumik imaluunniit aningaasaateqarfiup ingerlaqqissinnaannginneranik kinguneqarsinnaaneranik aarlerinartitsilersunik immikkut ittumik atuisinnaapput imaluunniit tamatumunnga peqataallutik.

Pilersitsisumit il.il. kingorna pigilikkat

§ 62. Pilersitsisumit il.il. nalilinnik pigisaqalernerup aningaasaateqarfimmut taassumaluunniit akiligassaqarfiinut ajoqutaannginnissaa aqutsisut akisussaaffigaat. Aningaasaateqarfik nalilinnik pilersitsisumit pigisaqalerpat, pigisaqalernerumut aningaasaateqarfik akiliuteqarsimappat, akiliutillu tunngaviusumik aningaasaatit minnerpaamik 10 procenterippatigit, pigisaqalernerup aningaasaateqarfinnut oqartussanit akuersissutigineqassaaq. Inunnit inummumut oqaaseqatigiinni siullerni pineqartumut katissimanermikkut, aalajangersimasumik inooqateqarnermikkut, imaluunniit pineqartumut siulitut kingulitulluunniit imaluunniit qatanngutitut ilaqutaanermikkut pineqartumut attuumassuteqartunit, allatigulluunniit pineqartumut immikkut ittumik qanittunit pigisarilikkanut assigisaa atuuppoq.

Imm. 2. Pigisaqalernerumit pissutsit erseqqinnerusut pillugit nassuiaammik imm. 1-imiittut akuersissutiginnissaannut atugassamik siulersuit suliaqassapput. Tamatuma saniatigut pigisaqalernerup § 34-mut ilaanngippat, § 33 malillugu naliliinermut nalunaarusiaq suliarineqassaaq. Pigisariligarli suliffeqarfiuppat pioreersoq, § 33, imm. 4 malillugu oqimaaqatigiissitsineq, suliffeqarfimmut pineqartumut pigilerlugu tigusinerumit oqimaaqatigiissitsinertut suliarineqassaaq.

Imm. 3. Aningaasaateqarfiup niuernermut atatillugu nalinginnaasumik atuineranut imm. 1 aamma 2 assigisaanik atorneqassanngillat.

Atuinerit assuarnartut

§ 63. Aqutsisunut ilaasortat imatut atuissanngillat, atuineq aningaasaateqarfiup akiligaanik aqutsisunut ilaasortat allaluunniit assuarnartumik iluaqutissaqalersinnissaannut

naleqquttuunera erseqqissalluni. Siulersuisunut ilaasortat aalajangiineri assuarnartut, inatsisinut malittarisassanulluunniit akerliusut atorsinnaanngillat.

Imm. 2. Aningaasaateqarfiup aqutsisullu ataatsip arlallilluunniit akornanni isumaqatigiissutit taamaallaat atorsinnaapput, kingusinnerusukkut uppersarneqarsinnaasumik oqaasertalersorneqarunik, isumaqatigiissutit isumannaagassanut suliarineqalereersunut atatillugu nalinginnaasumik atugassaqartitaalluni isumaqatigiissutaanngippata.

Sulisut sinniisui

§ 64. Siulersuisunut ilaasortanik sulisut qinersisarnerat pillugu maleruagassat piginneqatigiiffiit pillugit inatsimmi, kunngip peqqussutaatigut Kalaallit Nunaanni atuutsinneqalersumi, taannalu malillugu aalajangersakkani aalajangersagaasut, aningaasaateqarfinni inuussutissarsiornermik ingerlatsisuni suliffeqarfinnilu taassuma pigisaani assigisaanik atorneqassapput. Siulersuisunut ilaasortat sulisunit qinerneqartut, taamaallaat apeqqutit inuussutissarsiutitut suliffeqarfimmut tunngasuunngitsut suliarineqarneranni peqataassapput, tamanna malittarisassani aalajangersagaappat. Siulersuisunut ilaasortat nutaat siulersuisunut ilaasortanit toqqarneqassatillugit, siulersuisunut ilaasortat sulisunit qinigaasut toqqaanermi peqataassanngillat, malittarisassani allamik aalajangiisoqarsimanngippat.

Imm. 2. Aalajangiisoqarnerani siulersuisunut ilaasortat aalajangersimasumik amerlassusillit imaluunniit ilaasortat ilaat aalajangersimasumik amerlassusillit najuunnissaat piunasaqaataappat, siulersuisunut ilaasortat sulisunit qinigaasut imm. 1, oqaaseqatigiit aappaat pingajualluunniit malillugit suliarinninnermut peqataanngitsut naatsorsuinnermut ilaatinneqassanngillat.

Imm. 3. Aningaasaateqarfinni inuussutissarsiornermik ingerlatsisuni piginneqatigiiffimmut piginneqatigiiffissuarmulluunniit sinniisoqarneq pillugu malerugassanik immikut ittunik Erhvervsstyrelsi aalajangersaasinnaavoq.

Piginneqatigiiffissuarmut attuumassutit il.il. pillugit ilisimatitsineq

§ 65. Piginneqatigiiffissuarmut attuumassutit pilerniariartut aningaasaateqarfimmut piginnittumut siulersuisut suliffeqarfik pigisap ilisimatissavaat. Paasissutissat piginneqatigiiffissuup inissisimanerata piginneqatigiiffissuullu sulinerata inerneranik naliliinissamut pisariaqartinneqartut suliffeqarfiup pigisap aningaasaateqarfimmut piginnittumut tunniutissavai.

§ 66. Suliffeqarfinni pigisani piginnittuussutsit pillugit aqutsisunut ilaasortat iluanaarniuteqassanngillat, iluanaarniarnernulluunniit peqataanatik.

Aningaasaatinik annaasaqarneq

§ 67. Nammineq aningaaitit tunngaviusumik aningaasaaitit affai inorlugit annertussuseqalersimanerisa paasineqarneranit kingusinnerpaamik qaammatit pingasut qaangiunneranni siulersuisut ataatsimiinnissaat siulersuisut qulakkiissavaat. Siulersuisut ataatsimiinneranni iliuutsinik tunngaviusumik aningaasaaitit tamakkiisumik matussusernerannik kinguneqartussanik siulersuisut siunnersuuteqassapput, aningaasaateqarfiulluunniit atorunnaarsinneqarnissaa siunnersuutigalugu.

Imm. 2. Imm. 1-ip eqqortinniarneranut siulersuisut §§ 81-86 isiginiarlugit, tunngaviusumik aningaasaaitit ikilisinissaat aalajangersinnaavaat. Tunngaviusumik aningaasaaitit

ikilisinneqarnermik kingorna aningaasanit § 31-mi aalajangersagaasunit ikinneruppata, aningaasaateqarfiup atorunnaarsinneqarnissaa siulersuisut siunnersuutigissavaat.

Imm. 3. Siulersuisut ataatsimiinnerannit, tak. imm. 1 kingusinnerpaamik sapaatit akunnerisa tallimat qaangiunneranni siulersuisut ataatsimiinnerannit protokolimut allattukkat allaganngortinnerat, tak. § 53, imm. 4, aningaasaateqarfiup aningaasatigut inissisimanera pillugu nassuiaatitalik siulersuisut aningaasaateqarfinnut oqartussanut nassutissavaat.

Imm. 4. Siulersuisunut ataatsimiigiaqqusisoqanngippat, imaluunniit aningaasaateqarfiup aningaasatigut atugaasa imm. 1 malillugu iluarsinnginnissaat siulersuisut aalajangerpassuk, aningaasaateqarfiup §§ 115-117-imi maleruagassat malillugit pinngitsaaliissummik atorunnaarsinneqarnissaa aningaasaateqarfinnut oqartussat sulissutigissavaat.

Sinniisuutitaasinnaaneq atsiorsinnaatitaanerlu

§ 68. Aqutsisunut ilaasortat aningaasaateqarfik inuussutissarsiornermik ingerlatsisoq avammut sinniisuuffigaat.

Imm. 2. Isumaqatigiissutinit, aningaasaateqarfik sinnerlugu siulersuisunit tamarmiusunit, siulersuisunut ilaasortamit ataatsimit pisortamilluunniit ataatsimit isumaqatigiissutigineqartunit aningaasaateqarfik pisussaaffilerneqartarpoq.

Imm. 3. Atsiorsinnaatitaaneq imm. 2 malillugu siulersuisuni ilaasortanut ataasiakkaanut pisortaanernulluunniit tunniunneqartoq, malittarisassani killilernerqarsinnaavoq, taamaasilluni atsiorsinnaatitaaneq taamaallaat ilaasortat arlallit atsiogatigiinnerattut atorneqarsinnaassalluni imaluunniit ilaasortaq ataaseq ilaasortalluunniit aalajangersimasut tamarmik immikkut ataatsimoorlutilluunniit atsiorsinnaanerattut atorneqarsinnaassalluni. Atsiorsinnaanermut allatigut killiliinerit nalunaarsorneqarsinnaanngillat.

Imm. 4. Piginnaatitsissut taamaallaat siulersuisunit tunniunneqarsinnaavoq.

Kapitali 8

Kukkunersiuiineq il.il.

§ 69. Aningaasaateqarfiup inuussutissarsiornermik ingerlatsisup ukiumoortumik naatsorsuutai kukkunersiuisumit arlalinnilluunniit akuerisaasunit, malittarisassat malillugit imaluunniit siulersuisunit toqqagaasunit kukkunersiorneqassapput. Malittarisassani allamik aalajangiisoqarsimanngippat, ukiumoortumik naatsorsuutit ataatsimiissutigineranni kukkunersiuisoq ukiut ataasiakkaarlugit siulersuisunit toqqarneqartassaaq, tak. § 59. Kukkunersiuisoq malittarisassat malillugit toqqarneqarpat, taamatut toqqaasinnaatitaaneq taamaallaat aningaasaateqarfiup pilersinneqarneraniit ukiut arfineq marluk tikillugit atuussinnaassaaq.

Imm. 2. Aningaasaateqarfimmi kukkunersiuisoqanngippat, aningaasaateqarfinnut oqartussat kukkunersiuisumik toqqaassapput.

§ 70. Aningaasaateqarfinnut oqartussat aningaasaateqarfik sinnerlugu kukkunersiuisumik akuerisaasumik allamik qaavatigut toqqaasinnaapput, tulliani ukiumoortumik naatsorsuutit ataatsimiissutiginnissaasa tungaanut kukkunersiuisoq kukkunersiuisulluunniit toqqagaasut peqatigalugit kukkunersiuiinnermut peqataasussamik, tak. § 59. Peqqussummi matumani kukkunersiuisoq pillugu aalajangersakkat sinneri kukkunersiueqataasumut tassunga assigisaanik atorneqassapput.

Imm. 2. Kukkunersiueqataasutut toqqagaasooq Erhvervsstyrelsip qarasaasiaqarfiani nalunaarsorneqassaaq. Kukkunersiueqataasup aningaasarsiasai aningaasaateqarfinnut

oqartussat aalajangersassavaat. Kukkuersiueqataasumut aningaasartuutit naalagaaffiup karsianit akilerneqarallassapput, naggataagulli aningaasaateqarfimmit akilerneqassallutik.

§ 71. Paasissutissat aningaasaateqarfimmik inuussutissarsiornermik ingerlatsisumik, aningaasaateqarfillu aningaasaateqarfiuppat piginnittoq, taassuma piginneqatigiiffissuanik, naliliinermut pingaaruteqartutut isigineqartut kukkuersiuisup aqutsisunut ilaasortanit piunasaqaatigisinnavaa, tak. § 6.

§ 72. Kukkuersiuisoq pillugu allannguutit nalunaarsorneqassapput imaluunniit nalunaarsugassanngorlugit nalunaarutigineqassallutik, tak. § 12, imm. 1.

Imm. 2. Kukkuersiuisoq kukkuersiuisumik toqqaasumit aningaasaateqarfinnut oqartussanilluunniit tunuartinneqarsinnaavoq. Kukkuersiuisoq suliap naannginnerani taamaallaat pissutsit tunngavilersugaasut tamanna pisariaqartippassuk tunuartinneqarsinnaavoq.

Imm. 3. Kukkuersiuisoq soraarpat, imaluunniit kukkuersiuisup suliaa naammassitinnagu kukkuersiuiueq allatigut unitsinneqarpat, imaluunniit kukkuersiuisumik taarsiineq siulersuisut kukkuersiuisullu akornanni isumaqatigiinngissutit pissutaappata, kukkuersiuisup tamanna aningaasaateqarfinnut oqartussanut ingerlaannaq nalunaarutigissavaa. Suliap unitsinneranut sukumiisumik nassuiaat nalunaarummut ilanngunneqassaaq.

§ 73. Siulersuisut atuagaatinik, allattuiffinnik protokolinnillu pilersitsinissamut taakkunungalu allattuinnissamut pisussaaffimminnik eqqortitsinersut, kiisalu kukkuersiuisut oqaaseqaataasa saqqummiunnissaannut atsiornissaannullu maleruagassat eqqortinneqarnersut kukkuersiuisup nakkutigissavaa. Piunasaqaatit pineqartut eqqortinneqanngitsut kukkuersiuisup paasiguniuk, tamanna pillugu oqaaseqaammik immikkuullarissumik kukkuersiuisoq suliaqassaaq, taannalu aningaasaateqarfinnut oqartussanut nassiunneqassaaq.

§ 74. Aningaasaateqarfiup inuussutissarsiornermik ingerlatsisup naatsorsuuserinermut atortuinik aningaasaateqarfimmilu pissutsinik isornartorsiuerpalaartumik misissuinerminut atatillugu, kukkuersiuiueq pillugu piunasaqaatit aningaasaateqarfinnut oqartussat piunasaqaatigisai kukkuersiuisup malissavaa.

Imm. 2. Peqqussut manna, peqqussut manna malillugu aalajangersakkat malittarisassalluunniit malinneqanngippata, unioqqutitsinerlu pineqartoq pingaaruteqanngitsuunngippat imaluunniit erninnaq iluarsineqarani, kukkuersiuisoq ingerlaannaq aningaasaateqarfinnut oqartussanut nalunaaruteqassaaq. Aammattaq pissutsit kukkuersiuisup sulinermini ilisimalersimasai pillugit, aqutsisunullu ilaasortat iliutsit qaangiinnaanerilluunniit aningaasaateqarfimmik, suliffeqarfinnik tassunga atasunik, akiligassaqarfinnik sulisunilluunniit kalluaasut pillugit taarsiissuteqartitaasinnaanerat pillaatissinnaaneralluunniit tunngavissaqartumik ilimanaateqarpat, aningaasaateqarfinnut oqartussat aamma ingerlaannaq immikkuullarissumik nalunaarfigineqassapput. Ilanngullugu tulliuttunik unioqqutitsinermi tamatigut ilisimatitsisoqartassaaq

- 1) pinerluttulerinermik inatsimmi kapitali 23 aamma akileraartarnermut, akitsuutitut tapiissutinullu inatsisit, aamma
- 2) naatsorsuutit saqqummiunneqarnissaannut inatsisit, naatsorsuutitut allattuineq naatsorsuuserinermilu atortunik toqhortaateqarneq.

Imm. 3. Kukkuersiuisoq kukkuersiuisut pillugit inatsit malillugu nalunaarummik tunniussinerminut atatillugu, aningaasaateqarfimmi pissutsinik uparuaanissamut tunngavissuunniit tamatuma saniatigut paasissutissinneqaruni imaluunniit

oqaaseqaatissaqarluni, kukkunersuiisoq ingerlaannaq tamanna pillugu aningaasaateqarfinnut oqartussanut nalunaaruteqassaaq.

§ 75. Aningaasaateqarfimmi pissutsit pillugit paasissutissanik tunniussinissamut aningaasaateqarfinnut oqartussat kukkunersuiisoq peqqusinnaavaat.

Kapitali 9

Agguaassinerit aningaasaatillu allatigut ikilinerat il.il.

§ 76. Aningaasaateqarfiup inuussutissarsiornermik ingerlatsisup aningaasaataasa ikilinerat taamaallaat imatut pisinnaavoq

- 1) agguaassineq, tak. §§ 77-79, imaluunniit
- 2) aningaasaatinik ikilisitsineq, tak. §§ 81-86.

Imm. 2. Aningaasaatit ikiliartorerat aningaasaateqarfiup, aningaasaateqarfinnilu piginnittuni piginneqatigiiffissuup aningaasaqarnikkut inissisimaneranut illersorneqarsinnaanissaanut, kiisalu aningaasaateqarfinnut taassumalu akiligassaqarfiinut ajoqutaannginnissaa, tak. § 38, imm. 1, nr. 5 siulersuisut akisussaaffigaat. Tamatuma saniatigut aningaasaatit ikilinerisa kingorna tunngaviusumik aningaasaatinut pissamaatinullu, inatsisit malittarisassallu malillugit pituttugaasunut matussutissaqarnissaq siulersuisut akisusaaffigaat.

Agguaassineq

§ 77. Siunertanut malittarisassani aalajangersagaasunut, tak. § 27, imm. 1, nr. 10, § 78 naapertorlugu agguaassinissaq siulersuisut akisussaaffigaat. Aningaasaateqarfiup inuussutissarsiornermik ingerlatsisup aalajaallisarnissaanut siulersuisut naammaginartunik illikartitaqarsinnaapput.

§ 78. Agguaassinermi taamaallaat pissamaatit pituttugaanngitsut atorneqarsinnaapput, tassani aningaasat aningaasaateqarfiup ukiumoortumik naatsorsuutaani kingullerni akuerineqartuni sinneqartoorutitut allanneqarsimasut, pissamaatillu inatsisit malittarisassalluunniit malillugit pituttugaanngitsut, amigartoorutininuunneqartunik ilanngaasikkat pineqarput.

Imm. 2. Aningaasaateqarfiup ukiumoortumik nalunaarusiaata siulliup saqqummiunneqarnerata kingorna sinneqartoorutitut iluanaarutigineqartut pissamaatillu pituttugaanngitsut, piffissap ukiumoortumik nalunaarusiorfiusup kingorna pilersimasut pituttugaajunnaarsimasulluunniit agguaassinermut aamma atorneqarsinnaapput, aningaasat agguaanneqarsimanngippata, atorneqarsimanatik pituttugaanatilluunniit.

Imm. 3. Aningaasanik imm. 2-mut ilaasunik atuinermi, agguaassinissamut siulersuisut aalajangerannut oqimaaqatigiissitsineq ilanngunneqassaaq. Ukiumoortumik nalunaarusiami kingullermi oqimaaqatigiissitsinerup ilanngunneqarnissaa illersorneqarsinnaanersoq, imaluunniit piffissap qiteqqunnerani oqimaaqatigiissitsinermik, agguaassinissamut aningaasanik naammattunik atugassaqartoqarneranik takutitsisumik suliarinnittoqassanersoq siulersuisut nalilersussavaat, taamaattoq tak. imm. 4.

Imm. 4. Aningaasaateqarfiup ukiumoortumik nalunaarusiaata kingulliup ullulernerarneranit qaammatit arfinillit sinnerlugit qaangiunneranni agguaassinissamik aalajangertoqarpat, imm. 3 apeqqutaatinnagu aningaasanik agguaassinissamut naammattunik atugassaqartoqarneranik takutitsisumik piffissap qiteqqunnerani oqimaaqatigiissitsinermik suliaqartoqartassaaq.

Imm. 5. Imm. 3 aamma 4 malillugit piffissap qiteqqunnerani oqimaaqatigiissitsinermik suliaqartoqarpat, piffissap qiteqqunnerani oqimaaqatigiissitsineq kukkunersuisumit misissorneqarsimassaaq. Piffissap qiteqqunnerani oqimaaqatigiissitsineq, maleruagassat aningaasaateqarfiup ukiumoortumik nalunaarusianut suliarinninnermini atortagai malillugit suliarineqassaaq. Piffissap qiteqqunnerani nalunaarusiaq agguaassinissamut aalajangernerup ulluanit qaammatinik arfinilinnik sioqqutsisumik ullulerneqarsimassanngilaq.

Imm. 6. Aningaasaviit atornagit nalillit allat atorlugit agguaassisoqarpat, naliliinermut nalunaarusiaq suliarineqassaaq, tak. § 33. Aningaasaviit pinnagit nalilimmu imaluunniit nalilinnut agguaanneqartunut naligititaaq aningaasat agguaanneqartut minnerpaamik naleqatigigaat, naliliisartup nalunaarutaani oqaatigineqassaaq. Siulersuisut § 34, imm. 2-mi maleruagassat malillugit nalunaarummik suliaqarpata nassiusillutillu, § 34, imm. 1-imi eqqaanneqartut nalilinnik agguaassinermi naliliinermut nalunaarusiamik suliaqartitsinissamut pisussaaffeqanngillat. Agguaassinissamut aalajangernermit kingusinnerpaamik sapaatit akunnerisa tallimat qaangiunneranni, siulersuisut nalunaarut Erhvervsstyrelsip qarasaasiaqarfiatigut tamanut saqqummiutissavaat, tak. § 12, imm. 3. § 33, imm. 4 malillugu oqimaaqatigiissitsineq suliffeqarfimmu tunniunneqartumut tunniussinermi oqimaaqatigiissitsinertut suliarineqassaaq.

Imm. 7. Siulersuisut agguaassinissamut aalajangernerat protokolimut allanneqassaaq. Nalilinnik imm. 2-mu ilaatinneqartunik atuinnermi, piffissap qiteqqunnerani oqimaaqatigiissitsineq imaluunniit ukiumi naatsorsuiffiusumi kingullermi oqimaaqatigiissitsineq, aalajangernermut pineqartumut ilanngussatut siulersuisut protokolianut ilanngunneqassaaq.

§ 79. Siunertamut agguaassineq aningaasaateqarfiup aningaasaataanut naleqqiullugu erseqqissumik naleqqutinngippat, agguaassinerup annertusineqarnissaata annikillineqarnissaataluunniit eqqarsaatigineqarnissaa aningaasaateqarfinnu oqartussat siulersuisunut piumasarisinnaavaat.

Imm. 2. Agguaassinerup annertussusaa malittarisassanik unioqqutitsinermik kinguneqarsinnaanerani aarlerinartitsilersutut isigineqartariaqarpat, aningaasaateqarfinnu oqartussat siulersuisunut isumaqatigiinniareerunik, agguaassinerup annertusineqarnissaa annikillisinneqarnissaaluunniit siunertaralugu siulersuisut pisariaqartitanik atueqqullugit peqqusinnaavai.

Agguaassiffigisat allattorsimaffiat

§ 80. Ukiumi naatsorsuiffiusumi aningaasaateqarfimmit agguaassinermi pissarsisut allattorsimaffiat kingusinnerpaamik aningaasaateqarfiup ukiumoortumik nalunaarusiaata Erhvervsstyrelsimu nassiunneqarnerata peqatigisaanik siulersuisut aningaasaateqarfinnu oqartussanut nassiutissavaat.

Imm. 2. Allattorsimaffik, tak. imm. 1, uppersaatitut allakkiatut immikkuullarissutut nassiunneqarpat, allattorsimaffik allagaatinik takunnissinnaatitaanermu ilaassanngilaq.

Aningaasaatit ikilisinneqarnissaannik aalajangerneq

§ 81. Siulersuisut aningaasaateqarfinnu oqartussat akuersinerisigut tunngaviusumik aningaasaatit ikilisinneqarnissaat aalajangersinnaavaat, malittarisassat allanngortinnerat ilanngullugu. Aningaasaatit ikilisinneqarnissaannik aalajangernermi aningaasat, tunngaviusumik aningaasaatit annikillissutigisassaat taaneqassappu, aningaasallu siunertanut tulluuttunut sorlernu atorneqarnissaat taaneqassalluni:

- 1) Amigartoorutininik matussusiinermu,

- 2) agguaassinermut, imaluunniit
- 3) immikkut ittumik pissamaatinut toqqorsineq.

Imm. 2. Tunngaviusumik aningaasaatit piffissap erseqqinnerusumik aalajangersagaasup ingerlanerani siunertamut agguaassinissaq siunertaralugu aningaasanik aalajangersimasunik, imaluunniit piginnittuussutunik aalajangersimasunik ikilisinneqartassasut malittarisassani aalajangerneqarsinnaavoq. Ikilisitsinerup kinguneranik malittarisassani allannguutitut pisariaqartitat siulersuisunit aalajangerneqassapput nalunaarsorneqassallutillu imaluunniit nalunaarsorneqartussanngorlugit nalunaarutigineqarlutik, tak. § 12, imm. 1.

Imm. 3. Tunngaviusumik aningaasaatit aningaasaatit minnerpaaffissaattut § 31-mi aalajangersagaasunit ikinnerulersillugit ikilisinneqarsinnaanngillat.

§ 82. Tunngaviusumik aningaasaatit amerlassusaat malittarisassanik unioqquitsinermik kinguneqarsinnaasutut isigineqartariaqarpat, aningaasaateqarfinnut oqartussat siulersuisunut isumaqatigiinniareerunik aningaasaatit ikilisinneqarnissaannik siulersuisut peqqusinnaavai, tak. §§ 81 aamma 83-86.

Aningaasaviit atornagit nalilinnik allanik agguaassinikkut aningaasaatinik ikilisitsineq

§ 83. Aningaasaviit atornagit nalilinnik allanik agguaassinikkut aningaasaatinik ikilisitsisoqarpat, piffissami aalajangiiffiusumi naliliinermut nalunaarusiaq pigineqassaaq, tak. § 33. Aningaasaatinik ikilisitsinerup nalingata aningaasaviit atornagit nalilinnut imaluunniit nalilinnut agguaanneqartunut naliliunneqartut naleqatigigaat, naliliisartup nalunaarutaani oqaatigineqassaaq. Siulersuisut § 34, imm. 2-mi maleruagassat malillugit nalunaarusiorpata taassuminngalu nassiussillutik, nalilinnik agguaassinermi § 34, imm. 1-imi taaneqartutut naliliinermi nalunaarummik piniarnissaq pisussaaffiunngilaq. Agguaassinissaq pillugu aalajangernermit kingusinnerpaamik sapaatit akunnerisa tallimat qaangiunneranni nalunaarut siulersuisunit Erhvervsstyrelsen qarasaasiaqarfiaqatigut tamanut saqqummiunneqassaaq, tak. § 12, imm. 3. § 33, imm. 4 malillugu oqimaaqatigiissitsineq suliffeqarfik tunniunneqartoq pillugu tunniussinermi oqimaaqatigiissitsinertut suliarineqassaaq.

Aningaasaatinik ikilisitsineq pillugu nalunaaruteqarneq

§ 84. Aningaasaatit ikilisinneqarnissaannik aalajangerneq nalunaarsorneqassaaq imaluunniit nalunaarsorneqarnissamut nalunaarutigineqarluni, tak. § 12, imm. 1.

Akiligassaqarfinnut kaammattuutit

§ 85. Aningaasaatinik ikilisitsineq agguaassinikkut imaluunniit immikkut ittumik pissamaatinut toqqorsinikkut pippat, tak. § 81, imm. 1, nr. 2 aamma 3, aningaasaateqarfiup inuussutissarsiornermik ingerlatsisup akiligassaqarfii piffissaliussap sapaatit akunnerinik arfineq marlunnik sivisussuseqartup iluani aningaasaateqarfinnut piumasaqaatitik nalunaarutigeqqullugit kaammattorneqassapput. Tunngaviusumik aningaasaatit ikilisinneqarnissaannik siulersuisut aalajangernerisa nalunaarsorneqarnerani tamanullu saqqummiunneqarnerani kaammattuisoqassaaq.

Aningaasaatinik ikilisitsinerup piviusunngortinnera

§ 86. Akiligassaqarfiit nalunaaruteqarnissaannut piffissaliussaq qaangiuppat, tak. § 85, aningaasaatinik ikilisitsinerup piviusunngortinnissaa illersorneqarsinnaappat, tak. § 38, imm. 1, nr. 5, taamaattoq tak. imm. 4, agguaassinermut imaluunniit immikkut ittumik

pissamaatinut toqqorsinermut aningaasaatinik ikilisitsinerup piviusunnngortinnissaa siulersuisut aalajangersinnaavaat.

Imm. 2. Agguaassinermut imaluunniit immikkut ittumik pissamaatinut toqqorsinermut aningaasaatinik ikilisitsineq, ikilisitsinerup piviusunnngortinnissaa sioqqullugu aningaasaatinik ikilisitsinissamik aalajangernerup atorunnaarsinneqarnissaa nalunaarsorneqarsimanngippat imaluunniit nalunaarsorneqartussatut nalunaarutigineqarsimanngippat, tak. imm. 3, imaluunniit aningaasaatinik ikilisitsineq aatsaat Erhvervsstyrelsimut nalunaaruteqarnikkut piviusunnngortinneqartussaanngippat, tak. imm. 4 aamma 5, aningaasaateqarfimmut piunasaqaatit nalunaarutiginnissaanut piffissaliussap sapaatit akunnerinik arfineq marlunnik sivissuseqartup qaangiunnerani Erhvervsstyrelsimut nalunaarsuinerup oqartussaasut qaavatigut ilimasaareqqaarani piviusunnngortinneqarsinnaavoq, tak. § 85.

Imm. 3. Agguaassinermut imaluunniit immikkut ittumik pissamaatinut toqqorsinermut aningaasaatinik ikilisitsineq tamanut saqqummiunneqartut naapertorlugit piviusunnngortinneqarsinnaanngippat, tak. § 85, imaluunniit aningaasaatinik ikilisitsinerup piviusunnngortinnissaa illersorneqarsinnaanngippat, tak. § 38, imm. 1, nr. 5, siulersuisut imm. 2-mi piffissaliussap naannginnerani aningaasaatit ikilisinneqarnissaat atorunnaarsinneqassasoq nalunaarsussavaat imaluunniit nalunaarsugassannngorlugit nalunaarutigalugu.

Imm. 4. Piunasaqaatit akiligassannngortut nalunaarutigineqarsimasut eqqortinneqarsimanngippata, piunasaqaatillu sulit akiligassannngungitsut aaqqiagiinnngissutaasullu pillugit piunasaqartoqarneratigut toqqissimanartunik qularnaveeqqusisoqannngippat, agguaassinermut imaluunniit immikkut ittumik pissamaatinut toqqorsinermut aningaasaatinik ikilisitsisoqarsinnaannngilaq. Qularnaveeqqutitut neqeroortutigineqartup toqqissimanartutut isigineqarsinnaanera illuatungeriit qinnuteqarnerisigut Erhvervsstyrelsimut nalunaarsuinerup oqartussatut aalajangerneqassaaq.

Imm. 5. Agguaassinermut imaluunniit immikkut ittumik pissamaatinut toqqorsinermut aningaasaatinik ikilisitsineq Erhvervsstyrelsimut qarasaasiaqarfiani nalunaarsorneqassaaq imaluunniit nalunaarsorneqartussatut nalunaarutigineqarluni, kingusinnerpaamik ukiumoortumik nalunaarsuini aningaasaatinik ikilisitsinissamik aalajangernerup ulluata allanneqarfigisaata nassiunneqarnissaanut piffissaliussap naanerani, taamaattoq aningaasaatit ikilisinneqarnissaannik aalajangernermiit ukiup ataatsip qaangiunnerani. Piffissaliussaq qaangerneqarpat, aningaasaatinik ikilisitsinissap piviusunnngortinnissaanik aalajangerneq atorsinnaajunnaassaaq.

Imm. 6. Aningaasaatit ikilisinneqarnissaannik aalajangernerup nalunaarsorneqarnerata kingorna, tak. § 84, aningaasaateqarfik pillugu allannginerit ilaasa aningaasaatinik ikilisitsinerup atorunnaarsinneqarneranik kinguneqartussaanerata, imaluunniit Erhvervsstyrelsimut nalunaarsuinerup oqartussatut nalunaaruteqareernikkut aningaasaatinik ikilisitsinerup piviusunnngortinneqarnissaa pillugu maleruagassanik Erhvervsstyrelsi aalajangersaasinnavaoq.

Pilersitsisumut, aqutsisunut ilaasortanut il.il. agguaassinerit

§ 87. Pilersitsisunut, aqutsisunut ilaasortanut, kukkunerisuiunut inunnulluunniit aningaasaateqarfimmi aqutsisutut atorfimmi inissimasunut, aningaasarsiat, suliap qanoq ittuunera suliallu annertussusaa malillugu nalinginnaasutut isigineqartunit qaangiisussaannngitsut saniatigut tunniussisoqassannngilaq. Inuit taaneqartut arlaannut katissimanermigut imaluunniit aalajangersimasumik inooqateqarnermigut attuumassuteqartunut, inuillu taaneqartut meeraannut ukiukinnerusunut assigisaa atuuppoq.

Imm. 2. Inunnut imm. 1-imi taaneqartunut attartortitsineq qularnaveeqqusiinerluunniit inerteqqutaavoq.

Imm. 3. Aningaasaateqarfik inuussutissarsiornermik ingerlatsisoq nalinginnaasumik niuernermut atatillugu atuinermini inunnut imm. 1-imi taaneqartunut imm. 2 apeqqutaatinnagu attartortitsisinnaavoq imaluunniit qularnaveeqqusiisinnalluni.

Utertitsineq

§ 88. Peqqussummi matumani aalajangersakkanut akerliusumik agguaassisoqarsimappat imaluunniit aningaasaatit allatigut ilanngarneqarsimappata, tiguisut aningaasat tigusimasatik utertissavaat, ukiumoortumik ernianik, kingusinaarluni akiliinermi il.il. erniat pillugit inatsimmi, kunngip peqqussutaatigut Kalaallit Nunaanni atuutsinneqalersumi § 5, imm. 1 aamma 2 malillugit aalajangersagaasunik, 2 procentinik ilassutilinnik ernialerlugit. Tamannali taamaallaat atuutissaaq aningaasanik tunniussineq inatsisunik unioqqutitsinerusoq tiguisup paasisimappagu imaluunniit paasisimasariaqaraluarlugu, taamaattoq tak, § 49, imm. 2.

Imm. 2. Aningaasaateqarfik inuussutissarsiornermik ingerlatsisoq § 87, imm. 2-mut akerliusumik attartortitsisimappat imaluunniit attartukkanut qularnaveeqqusiisimalluni, aningaasat aningaasaateqarfimmut utertinneqassapput ukiumoortumik ernianik, kingusinaarluni akiliinermi il.il. erniat pillugit inatsimmi, kunngip peqqussutaatigut Kalaallit Nunaanni atuutsinneqalersumi § 5, imm. 1 aamma 2 malillugit aalajangersagaasunik, 2 procentinik ilassutilinnik ernialerlugit, erniat qaffasinnerusut isumaqatigiissutigineqarsimangippata.

Imm. 3. Imm. 1 imaluunniit 2 malillugit utertitsisoqarsinnaangippat, imaluunniit tiguisoq utertitsinissamut pisussaaffeqangippat, tak. imm. 1, oqaaseqatigiit aappaat, siulersuisuni ilaasortat akiliinissamik aalajangernermet peqataasimasut imaluunniit akiliinerup piviusunnagortinneranut peqataasimasut, imaluunniit naatsorsuutitut eqqunngitsumik allanneqarnerata akuersissutigineranut peqataasimasut, taarsiissuteqarnissamut maleruagassat nalinginnaasut malillugit annaasanut aningaasaateqarfiup annaasinnaasaanut akisussaasuupput.

Imm. 4. Aalajangersakkamut matumunnga akerliusumik qularnaveeqqusiisoqarsimanera isumaqatigiissummi illuatungiusup ilisimasimangippagu, § 87, imm. 2-mut akerliusumik qularnaveeqqusiineq aningaasaateqarfimmut pituttuisuussaaq.

Kapitali 10

Malittarisassanik allanngortitsineq

§ 89. Siulersuisut inassuteqarnerisigut malittarisassani aalajangersakkamik allanngortitsinissaq, imaluunniit aningaasaateqarfiup inuussutissarsiornermik ingerlatsisup atorunnaarsinneqarnissaa, taamaattoq tak. imm. 2, aningaasaateqarfinnut oqartussat akuerisinnaavaat. Aningaasaateqarfiup aningaasaateqarfimmut arlalinnulluunniit, aningaasaateqarfiit peqatigiiffiillu ilaat pillugit inatsimmut, kunngip peqqussutaatigut Kalaallit Nunaanni atuutsinneqalersumut ilaatinneqartunut kattunneqarnissaa ilanngullugu akuerineqarsinnaavoq.

Imm. 2. Siunertat agguaassisarnerilluunniit pillugit malittarisassanik allanngortitsinermi aamma § 107 naapertorlugu aningaasaateqarfiup atorunnaarsinneqarnerani, imm. 1 naapertorlugu akuersisinnassagaanni, aningaasaateqarfinnut oqartussat Civilsstyrelsimit akuerineqaaqassapput.

Imm. 3. Imm. 1 aamma 2-mi aalajangersakkat atorneqassapput, malittarisassanik allanngortitsinissamut siulersuisut allalluunniit malittarisassatigut pisinnaatitaaffeqartitaanerat apeqquataatinnagu.

§ 90. Aalajangersagaq piviusunngortinneqarsinnaangippat imaluunniit siunertamut erseqqissumik naapertuutinngitsoq paasinarsippat, aningaasaateqarfinnut oqartussat siulersuisunut isumaqatigiinniareerunik Civilsstyrelsillu akuersineratigut, malittarisassani aalajangersakkap allanngortinneqarnissaa aalajangersinnaavaat.

Imm. 2. Malittarisassani aalajangersagaq inatsisinut imaluunniit aningaasaateqarfiup pilersinneranut uppersaatitut allakkiamut akerliuppat, pineqartup allanngortinneqarnissaa Civilstyrelsi aalajangersinnaavaa.

Kapitali 11

Kattunneq

Aningaasaateqarfiit inuussutissarsiornermik ingerlatsisut kattunnerat

§ 91. Aningaasaateqarfik inuussutissarsiornermik ingerlatsisoq kapitalimi matumani aalajangersakkat malillugit atorunnaarsitsinertaqanngitsumik atuuttuujunnaarsinneqarsinnaavoq, aningaasaateqarfiup naliliutaasa pisussaaffiisalu ataatsimut isigalugit aningaasaateqarfinnut inuussutissarsiornermik ingerlatsisumut allamut nuunnerisigut. Aningaasaateqarfiit marluk amerlanerusulluunniit aningaasaateqarfinnut ataasiinnanngortinneranni assigisaa atuuppoq. Akiligassaqarfiit akuersitinnagit nuussinerit piviusunngortinneqassapput.

Imm. 2. Aningaasaateqarfik inuussutissarsiornermik ingerlatsisoq atuuttuujunnaarsinnaavoq imm. 1 malillugu kattunnikkut, aningaasaateqarfiup ingerlaqqittup siunertai aningaasaateqarfiup atuukkunnaartup siunertaanut qanittuuppata, aningaasaateqarfiullu atuukkunnaartup siunertai

- 1) kattunnikkut pitsaanoqisumik isumagineqalissappata imaluunniit
- 2) eqqortinneqarsinnaajunnaarpata imaluunniit taamaallaat ajornakusoortumik eqqortinneqarsinnaappata imaluunniit naleqqukkunnaarsimappata.

Imm. 3. Aningaasaateqarfik inuussutissarsiornermik ingerlatsisoq imm. 1 malillugu kattunnermut aningaasaateqarfittut ingerlaqqissinnaavoq, imaappat

- 1) kattunneq aningaasaateqarfiup malittarisassaanut akerliunngippat aamma
- 2) kattunneq aningaasaateqarfiup soqutigisaatut isumaqarfigineqartariaqarpat.

Imm. 4. Aningaasaateqarfinni kattuttuni ataasiakkaani siulersuisut kattunnissaq pillugu aalajangiissapput, aningaasaateqarfinnut oqartussat § 96 malillugu tamatumunnga akuersissuteqarnissaat apeqquataatillugu.

Imm. 5. Piffissaq aningaasaateqarfiup atuukkunnaartup pisinnaatitaaffiisa pisussaaffiisalu naatsorsuuserinikkut aningaasaateqarfinnut ingerlaqqittumut nuunneqarsimasutut isigineqarsinnaanerat sioqqullugu aningaasaateqarfiup atuukkunnaartup ukiumoortumik naatsorsuiffini naareersimappagu, piffissamullu naatsorsuiffiusumut tamatumunnga ukiumoortumik nalunaarussiaq siulersuisunit suli akuerineqarsimangippat, piffissamut naatsorsuiffiusumut tamatumunnga ukiumoortumik nalunaarut siulersuisut kingusinnerpaamik kattunnissamik aalajangerup peqatigisaanik akuerissavaat.

Imm. 6. Aningaasaateqarfiup inuussutissarsiornermik ingerlatsisup atorunnaarsinneqalersup, atorunnaarsitsineri iluanaarutiniq agguaassineq suli aallartinneqarsimangippat, aningaasaateqarfittut atuukkunnaartut imaluunniit aningaasaateqarfittut ingerlaqqittut kattunnermut peqataaniarluni atorunnaarsitsinermik

unitsitsinissaa, atorunnaarsitsisartup aningaasaateqarfinnut oqartussanit akuerineqarluni aalajangersinnaavaa akueraluguluunniit. Aningaasaateqarfik aningaasaateqarfiussappat ingerlaqqittoq, kattunnissamut akuerineqassaguni, tak. § 96, peqqussummi matumani aalajangersakkanik malittarisassallu piumasaqaataanik eqqortitsinissaa piumasaqaataavoq, aningaasaatinut, aqutsinermut kukkунersiуinermullu piumasaqaatit ilanngullugit. Tamatuma kingorna akuerisaaqqinnermut § 119-imi maleruagassat atorneqassanngillat.

Imm. 7. Aningaasaateqarfiup inuussutissarsiорnermik ingerlatsisup pinngitsaaliissummik atorunnaarsinneqalersup aningaasaateqarfittut atuukkunnaartutut imaluunniit aningaasaateqarfittut ingerlaqqittutut kattunnermut peqataasinnaanera pigisanik agguaassisarnermut eqqartuussiviup imaluunniit atorunnaarsitsisartup pigisanik agguaassisarnermut eqqartuussivimmit toqqagaasup aningaasaateqarfinnut oqartussanit akuerineqarluni aalajangersinnaavaa akueraluguluunniit. Aningaasaateqarfik aningaasaateqarfiussappat ingerlaqqittoq, kattunnermut akuerisaanissaq pisariaqarpoq, tak. § 96, aningaasaateqarfiup peqqussummi matumani aalajangersakkanik malittarisassanilu piumasaqaatinik eqqortitsinissaa piumasaqaataavoq, aningaasaatinut, aqutsinermut kukkунersiуinermullu piumasaqaatit ilanngullugit. Tamatuma kingorna akuerisaaqqinnermut § 119-imi maleruagassat atorneqassanngillat.

Imm. 8. Aningaasaateqarfiup inuussutissarsiорnermik ingerlatsisup akiliisinnaajunnaartup aningaasaateqarfittut atuukkunnaartutut kattunnermut peqataanissaa akiliisinnaajunnaartunik suliarinnittartup aalajangersinnaavaa akueraluguluunniit.

Kattunnermut nassuiaat ataatsimoorussaq

§ 92. Aningaasaateqarfinni kattuttuni siulersuisut kattunnermut nassuiaat ataatsimoorussaq pilersissavaat ataatsimoorlutillu atsiорlugu, taassuma tulliuttut pillugit paasissutissat aalajangersakkallu imarissavai

- 1) aningaasaateqarfiit aqqi saniatigullu aqqi, aningaasaateqarfiup atuukkunnaartup aqqa saniatigulluunniit aqqa aningaasaateqarfiup ingerlaqqittup saniatigut aqqanut ilaassanersoq ilanngullugu,
- 2) aningaasaateqarfiit angerlarsimaffii,
- 3) aningaasaateqarfiup atorunnaartup pisinnaatitaaffiisa pisussaaffiisalu naatsorsuuserinikkut nuunneqarsimasutut qaqugukkut isigineqarnissaannut piffissaq, tak. imm. 2,
- 4) iluaqutissat suulluunniit, aqutsisunut ilaasortanut, pilersitsisunut allanulluunniit tunniunneqartut, aamma
- 5) § 96 malillugu akuerineqarnissaq siunertaralugu kattunnerup naleqquttuuneranik aningaasaateqarfinnut peqataasunut ataasiakkaanut tamanut tunngavilersuutit, aningaasaateqarfiit ataasiakkaat siunertaasa eqqortinnissaannut kattunnerup kingunissai pillugit nassuiaat kiisalu aningaasaateqarfiit kattuttut siunertaasa qanoq imminnut qanitsiginerat pillugu nassuiaat ilanngullugit.

Imm. 2. Kattunnermut nassuiaat ataatsimoorussaq kingusinnerpaamik ukiumi naatsorsuiffiusumi, piffissap kattunnerup naatsorsuuserinikkut sunniuteqalerfiata, tak. imm. 1, nr. 3, ilaaffigisaata naanerani atsiорneqarsimassaaq. Piffissaliussaq qaangerneqarpat, Erhvervsstyrelsiр nalunaarsuinnermut oqartussatut kattunneq nalunaarsorsinnaassanngilaa.

Piffissap qiteqqunnerani oqimaaqatigiissitsineq

§ 93. Kattunnermut nassuiaat ataatsimoorussaq ukiup naatsorsuiffiusup, aningaasaateqarfiup ukiumoortumik nalunaarusiaani kingullermi pineqartup naanerani qaammatit arfinillit sinnerlugit qaangiutereerneranni atsiорneqarsimappat,

anigaasaateqarfimmut pineqartumut piffissap qiteqqunnerani oqimaaqatigiissitsineq suliarineqassaaq. Piumasaqaammik tamatumingga atuinninnissamut anigaasaateqarfimmut oqartussat immikkut akuersissuteqarsinnaapput.

Imm. 2. Piffissap qiteqqunnerani oqimaaqatigiissitsineq, ukiumoortumik naatsorsuutit pillugit inatsit, kunngip peqqussutaatigut Kalaallit Nunaanni atuutsinneqalersoq malillugu suliarineqartussaasoq, kattunnermut nassuiaatip ataatsimoorussap atsiorneqarnerata qaammatit pingasut siornagut naammassisutut ullulerneqarsimassanngilaq. Piffissap qiteqqunnerani oqimaaqatigiissitsineq kukkunersiorneqarsimassaaq.

Akiligassa qarfiit inissisimanerat pillugu naliliisartut nalunaarutaat

§ 94. Anigaasaateqarfinni ataasiakkaani akiligassa qarfiit anigaasaateqarfiup maanna inissisimaneranut naleqqiullugu kattunnerup kingorna naammattumik qularnaveeqqusigaasimasutut isumaqarfigineqarsinnaanerata pillugu naliliisartuq immikkut ilisimasalik arlaannaannulluunniit attuumassuteqanngitsoq arlallilluunniit anigaasaateqarfiit kattuttut ataasiakkaat tamaasa pillugit allakkatigut nalunaarusiussaaq.

Imm. 2. Naliliisartut § 33, imm. 2, oqaaseqatigiit pingajuat malillugu toqqarneqassapput. Naliliisartuq ataaseq arlallilluunniit ataatsimoorullugit atorneqarnissaat anigaasaateqarfiit kattuttut siulersuisuisa kissaatigippassuk, taakku siulersuisoqatigiiaat qinnuteqarnerisigut piffimmi anigaasaateqarfiup ingerlaqqittup angerlarsimaffigisaani pigisanik agguaaassisarnermut eqqartuussiviup toqqassavai. Naliliisartut anigaasaateqarfimmut kattuttunut tamanut attuumassutaat pillugit § 33, imm. 2, oqaaseqatigiit sisamaat assigisaanik atorneqassaaq.

Imm. 3. Anigaasaateqarfinni peqataasuni tamani akiligassa qarfiit anigaasaateqarfiit maanna inissisimanerinut naleqqiullugu kattunnerup kingorna naammaginatsumik qularnaveeqqusigaasimanerannik isumaqartariaqarnermut imm. 1 malillugu nalunaarutip pitsaasumik oqaaseqaatitaqarnissaa, anigaasaateqarfimmut oqartussat kattunnermut akuersinissaannut piumasaqaataavoq.

Kattunnermik nalunaaruteqarneq uppersaataitullu allakkianik nassiussineq

§ 95. § 92 malillugu kattunnermut nassuiaatip ataatsimoorussap atsiorneqarneraniit kingusinnerpaamik sapaatit akunnerisa arfineq marluk qaangiunneranni Erhvervsstyrelsiq nalunaarsuinermut oqartussatut anigaasaateqarfimmut peqataasunit tamanit tullittut tigoreersimassavai

- 1) kattunnerup nalunaarutigina,
- 2) kattunnermut siulersuisut aalajangerannut uppersaataitut allakkia, tak. § 91, imm. 4,
- 3) kattunnermut nassuiaat ataatsimoorussaq, tak. § 92,
- 4) taamaattoqarpat piffissap qiteqqunnerani oqimaaqatigiissitsineq, tak. § 93,
- 5) akiligassa qarfiit inissisimanerat pillugu naliliisartut nalunaarutaat, tak. § 94, aamma
- 6) malittarisassat ullulikkat, kattunnermut atatillugu anigaasaateqarfimmut nutaamik pilersitsisoqarpat imaluunniit anigaasaateqarfimmi ingerlaqqittumi malittarisassanik allannguisoqarpat.

Imm. 2. Kattunneq § 96 malillugu anigaasaateqarfimmut oqartussanit akuersissutigineqassappat, anigaasaateqarfik pillugu paasissutissanut nalunaarsugaasunut allanngunerup kinguneranik allannguutaasinnaasut imm. 1 malillugu nalunaarummut ilaassapput.

Kattunnermut anigaasaateqarfimmut oqartussat akuersinerat

§ 96. Kattunnissamut siulersuisut aalajangernerannut aningaasaateqarfinnut oqartussat akuersinissaat piumasagaataavoq. § 91, imm. 2-8-mi, § 92, imm. 1-imi, § 93-imi, § 94, imm. 3-mi, aamma § 95, imm. 1-imi piumasagaatit eqqortinneqarsimappata, aningaasaateqarfinnut oqartussat kattunnissamut akuersissuteqassapput.

Kattunnerup inatsisitigut sunniutaasa atuutilernerat

§ 97. Aningaasaateqarfik atuukkunnaartussaq atorunnaarsimasutut isigineqassaaq aamma pisinnaatitaaffiisa pisussaaffiisalu ataatsimoorlutik aningaasaateqarfimmut ingerlaqqittumut nuunneqarsimasutut isigineqassallutik, imaappat

- 1) kattunnissamut akuersissuteqartoqarpat, tak. § 96, aamma
- 2) kattunneq Erhvervsstyrelsen qarasaariaqarfiani nalunaarsorneqareerpat.

§ 98. Aningaasaateqarfik inuussutissarsiornermik ingerlatsisoq, kattunnermut atatillugu pilersinneqartoq aningaasaateqarfiup nalunaarsorneqarnera sioqqullugu isumaqatigiissuteqarpat, aningaasaateqarfiullu nalunaarsugaannginnera atsioqataasup ilisimappagu, nalunaarsugaanissaq itigartitsissutigineqarpat, allanillu isumaqatigiissuteqartoqarsimangippat, atsioqataasup isumaqatigiissut atorunnaarsissinnaavaa. Aningaasaateqarfiup nalunaarsugaannginnera atsioqataasup ilisimasimangippagu, aningaasaateqarfik nalunaarsorneqarsimangikkallartillugu atsioqataasup isumaqatigiissut atorunnaarsissinnaavaa.

Aningaasaateqarfiup inuussutissarsiornermik ingerlatsisup piginneqatigiiffimmik (-nnik) tamakkiisumik pigisaminik kattunnera

§ 99. Aningaasaateqarfiup piginnittup piginneqatigiiffik, aktianik piginneqatigiiffiusoq andelselskabiusorluunniit tamakkiisumik pigisani tigusinnaavaa, taamaasilluni piginneqatigiiffiup pigisap naliliutai pisussaaffiilu ataatsimoortillugit aningaasaateqarfimmit tiguneqassallutik, taamaasiornikkut piginneqatigiiffik pigisap atorunnaarsitsinertaqanngitsumik atuukkunnaarsinneqassaaq. Nuussinerit akiligassaqarfiit akuersiteqqaarnagit piviusunngortinneqassapput.

Imm. 2. Kattunnermut aningaasaateqarfimmut siulersuisut aalajangiisuussapput, aningaasaateqarfinnut oqartussat § 104 malillugu akuersissuteqarnissaat apeqqaataatillugu.

Imm. 3. Aningaasaateqarfimmut imm. 1 malillugu kattunnermut peqataasumut § 91, imm. 6 aamma 7 assigisaanik atorneqassapput.

Imm. 4. Piginneqatigiiffiup pigisap atuukkunnaartussap kattunnissaanut piginneqatigiiffiup qitiusumik aqutsisuutitai aalajangiissapput.

Imm. 5. Piginneqatigiiffik pigisap atuukkunnaartussaq atorunnaarsinneqalerpat, taamaallaat aningaasaatinik piginnittutut aningaasaateqarfimmut agguaassineq suli aallartinneqarsimangippat, atorunnaarsitsinissallu atorunnaarsinnissaa ataatsimeersuarnerup kingusinnerpaamik peqatigisaanik akuersissutigippagu imm. 1 malillugu kattunnissaq aalajangerneqarsinnaavoq. Piginneqatigiiffiit pillugit inatsimmi, kunngip peqqussutaatigut Kalaallit Nunaanni atuutsinneqalersumi suliamik suliarinneqqilerneq pillugu § 231 atorneqassanngilaq.

Imm. 6. Piginneqatigiiffik pigisap atuukkunnaalersoq pinngitsaalliissummik atuukkunnaalerpat, pigisanik agguaassisarnermut eqqartuussiviup imaluunniit atorunnaarsitsisartup pigisanik agguaassisarnermut eqqartuussivimmit toqqagaasup kattunnissamut akuersinissaa imm. 1 malillugu kattunnissap aalajangernissaanut piumasagaataavoq.

Imm. 7. Piginneqatigiiffik pigisap akiliisinnaajunnaartoq imm. 1 malillugu kattunnermut peqataasinnaavoq, akiliisinnaajunnaarnermut nakkutilliisoq tamatumunnga isumaqataappat.

Imm. 8. Piginneqatigiiffiup pigisap piffissaq taassuma pisinnaatitaaffiisa pisussaaffiisalu naatsorsuuserinikkut aningaasaateqarfimmut ingerlaqqittumut nuunneqarsimasutut isigineqarsinnaalernerat sioqqullugu ukioq naatsorsuiffiusoq naasimappagu, ukiumullu naatsorsuiffiusumut tamatumunnga ukiumoortumik nalunaarusiaq ataatsimeersuarnermit suli akuersissutigineqarsimangippat, piffissamut naatsorsuiffiusumut tamatumunnga ukiumoortumik nalunaarusiaq ataatsimeersuarnerup kingusinnerpaamik kattunnissamut aalajangerup eqatigisaanik akuersissutigissavaa.

Kattunnissamut nassuiaat ataatsimoorussaq

§ 100. Aningaasaateqarfimmi siulersuisut piginneqatigiiffinnilu pigisani qitiusumik aqutsisuutit kattunnermut nassuiaat ataatsimoorlutik pilersissavaat atsiurlugulu, tulliuuttu pillugit paasissutissat aalajangersakkallu nassuiaatip imarissavai

- 1) aningaasaateqarfiup suliffeqarfiillu pigisat aqqi taamaattoqarpallu saniatigut aqqi, suliffeqarfiillu pigisat atuukkunnaartut aqqi saniatigulluunniit aqqi aningaasaateqarfiup ingerlaqqittup saniatigut aqqanut ilaassanersoq ilanngullugu,
- 2) aningaasaateqarfiup suliffeqarfiillu pigisat angerlarsimaffii,
- 3) suliffeqarfiup pigisap atorunnaartup pisinnaatitaaffiisa pisussaaffiisalu naatsorsuuserinikkut aningaasaateqarfimmut nuunneqarsimasutut qaqugukkut isigineqarnissaannut piffissaq, tak. imm. 2,
- 4) iluaqutissat suulluunniit, aningaasaateqarfiup imaluunniit piginneqatigiiffiup pigisap aqutsisuinut tunniunneqartut, aamma
- 5) § 104 malillugu akuerineqarnissaq siunertaralugu kattunnermut tunngavilersuutit.

Imm. 2. Kattunnermut nassuiaat ataatsimoorussaq kingusinnerpaamik ukiumi naatsorsuiffiusumi, piffissap kattunnerup naatsorsuuserinikkut sunniuteqalerfiata, tak. imm. 1, nr. 3, ilaaffigisaata naanerani aningaasaateqarfik piginneqatigiiffiillu pigisat ataasiakkaat tamaasa sinnerlugit atsiorneqarsimassaaq. Piffissaliussaq qaangerneqarpat, Erhvervsstyrelsen nalunaarsuinerup oqartussatut kattunneq nalunaarsorsinnaassanngilaa.

Piffissap qiteqqunnerani oqimaaqatigiissitsineq

§ 101. § 93 aningaasaateqarfimmut assigisaanik atorneqassaaq.

Imm. 2. Piginneqatigiiffiit pillugit inatsimmi, kunngip peqqussutaatigut Kalaallit Nunaanni atuutsinneqalersumi § 239 piginneqatigiiffinnut pigisanut assigisaanik atorneqassaaq.

Akiligassaqarfiit inissisimanerat pillugu naliliisartut nalunaarutaat

§ 102. Aningaasaateqarfiup piginneqatigiiffinnillu pigisani ataasiakkaani akiligassaqarfiit aningaasaateqarfiup piginneqatigiiffiillu pigisat ataasiakkaat maanna inissisimanerannut naleqqiullugu kattunnerup kingorna naammattumik qularnaveeqqusigaasimasutut isumaqarfigineqarsinnaanerit pillugu naliliisartuq immikkut ilisimasalik arlaannaannulluunniit attuumassuteqanngitsoq arlallilluunniit aningaasaateqarfik piginneqatigiiffiillu pigisat kattunnermut peqataasut ataasiakkaat tamaasa pillugit allakkatigut nalunaarusiussaaq.

Imm. 2. Naliliisartut § 33, imm. 2, malillugu toqqarneqassapput. Naliliisartuq ataaseq arlallilluunniit ataatsimoorullugit atorneqarnissaat aningaasaateqarfimmut siulersuisut piginneqatigiiffinnilu pigisani peqataasuni qitiusumik aqutsisuutit kissaatigippassuk, taakku aqutsisuutit qinnuteqarnerisigut piffimmi aningaasaateqarfiup ingerlaqqittup

angerlarsimaffigisaani pigisanik agguassisarnermut eqqartuussiviup toqqassavai. Naliliisartut inatsisitigut akisussaasunut pisussaasunullu kattuttunut tamanut attuumassutaat pillugit assigisaanik § 33 atorneqassaaq.

Imm. 3. Inatsisitigut akisussaasuni pisussaasunilu peqataasuni tamani akiligassa qarfiit aningaasaate qarfiit piginneqatigiiffiillu pigisat ataasiakkaat maanna inissisimanerannut naleqqiullugu kattunnerup kingorna naammaginartumik qularnaveeqqusigaasimanerannik isumaqartariaqarnermut imm. 1 malillugu nalunaarutip pitsaasumik oqaaseqaatitaqarnissaa, aningaasaate qarfinnut oqartussat kattunnermut akuersinissaannut piumasaqaataavoq.

Kattunnermik nalunaarutiginnineq uppersaaitullu allakkianik nassiussineq

§ 103. § 100 malillugu kattunnermut nassuiaatip ataatsimoorussap atsiorneqarneraniit kingusinnerpaamik sapaatit akunnerisa arfineq marluk qaangiunneranni Erhvervsstyrelsip nalunaarsuinerup oqartussatut aningaasaate qarfimmit piginneqatigiiffinnillu pigisanit peqataasunit tamanit tulluuttut tigoreersimassavai

- 1) kattunnerup nalunaarutiginera,
- 2) kattunnissamik aalajangernerup uppersaaitut allakkia, tak. § 99, imm. 2 aamma imm. 4,
- 3) kattunnermut nassuiaat ataatsimoorussaq, tak. § 100,
- 4) piffissap qiteqqunnerani oqimaaqatigiissitsineq ilanngunneqarsinnaavoq, tak. § 101,
- 5) akiligassa qarfiit inissisimanerat pillugu naliliisartut nalunaarutaat, tak. § 102, aamma
- 6) malittarisassat ullulikkat, kattunnermut atatillugu aningaasaate qarfinmi malittarisassanik allannguisoqarpat.

Imm. 2. Kattunneq § 104 malillugu aningaasaate qarfinnut oqartussanit akuersissutigineqassappat, aningaasaate qarfik pillugu paasisutissanut nalunaarsugaasunut allannguinerup kinguneranik allannguutaasinnaasut imm. 1 malillugu nalunaarummut ilaassappat.

Kattunnermut aningaasaate qarfinnut oqartussat akuersinerat

§ 104. Kattunnissamut siulersuisut aalajangernerannut aningaasaate qarfinnut oqartussat akuersinissaat piumasaqaataavoq. Kattunnissamut aningaasaate qarfinnut oqartussat akuersissappat, imaappat

- 1) kattunneq aningaasaate qarfiup malittarisassaanut akerliunngippat,
- 2) kattunneq aningaasaate qarfiup soqutisaatut isumaqarfigineqartariaqarpat, aamma
- 3) § 99, imm. 2-mi 3-milu, § 100, imm. 1-imi, § 101-imi, § 102, imm. 3-mi, aamma § 103, imm. 1-imi piumasaqaatit eqqortinneqarpat.

Kattunnerup inatsisitigut sunniutaasa atuutilernerat

§ 105. Piginneqatigiiffiit pigisat peqataasut tamarmik atuukkunnaartutut isigineqarsinnaalerpata, taakkualu pisinnaatitaaffii pisussaaffiilu ataatsimoortillugit aningaasaate qarfinnut nuunneqarsimasutut isigineqarsinnaappata, kattunneq piviusunngortinneqarsimasutut isigineqassaaq imaappat

- 1) kattunnissamut akuersissuteqartoqareerpat, tak. § 104, aamma
- 2) kattunneq Erhvervsstyrelsip qarasaasiaqarfiani nalunaarsorneqareerpat.

§ 106. (Kalaallit Nunaanni atuutsinneqalissanngilaq)

Atuukkunnaarsitsineq

Atorunnaarsinneqarnissamut aalajangerneq

§ 107. Atorunnaarsitsinikkut nammineq piumassutsimik atuukkunnaarsitsineq pillugu siulersuisut aalajangiissapput, § 89, imm. 2 isiginiarlugu.

Imm. 2. Aningaasaateqarfik inuussutissarsionermik ingerlatsisoq malittarisassat malillugit piffissamut erseqqinnerusumik taaneqartumut pilersinneqarsimappat, siulersuisut kisimik imm. 1 malillugu aalajangiisinnaapput.

Atorunnaarsitsisartumik toqqaaneq

§ 108. Atorunnaarsitsineq piviusunnngortinniarlugu aningaasaateqarfinnut oqartussat siulersuisut inassuteqareernerisigut atorunnaarsitsisartumik ataatsimik arlalinnilluunniit toqqaassapput, taakkulu aqutsisunut taartaassapput. Peqqussummi tamatumani aqutsisut pillugit aalajangersakkat atorunnaarsitsisartumut atorneqassapput.

Imm. 2. Atorunnaarsitsisartog toqqagaagallartarpoq. Aningaasaateqarfinnut oqartussat atorunnaarsitsisartumik qaqugukkulluunniit tunuartsisinnaapput atorunnaarsitsisartumillu allamik toqqaallutik.

Imm. 3. Siulersuisut aningaasaateqarfiup atorunnaarsinneqarnissaanik aalajangerneermik peqatigisaanik, tak. § 107, imm. 1, atorunnaarsitsisartumik toqqaanissamut aalajangiissapput. Atorunnaarsitsinissamik aalajangernerup nalunaarsorneqarnerata nalunaarsorneqarnissamulluunniit nalunaarutigineqarnerata peqatigisaanik, tak. § 109, imm. 1, atorunnaarsitsisartog Erhvervsstyrelsimut inassutigineqassaaq.

Imm. 4. Atorunnaarsitsisartog Erhvervsstyrelsip qarasaasiaqarfiani nalunaarsorneqareerpat, tak. § 109, imm. 1, atorunnaarsitsinermik suliaq aallartinneqarsinnaavoq. Piffissami nammineq piumassutsimik atuukkunnaarsitsinissamik aalajangernermiit, tak. § 107, imm. 1, atorunnaarsitsisartumik toqqaanissap tungaanut, maannamut aqutsisuusut taamaallaat pisariaqartunik, aningaasaateqarfimmut, ilanngullugit aningaasaateqarfiup siunertaanut, soqutigisaanut akiligassaqarfiinullu, ajoqutaanngitsumik piviusunnngortinneqarsinnaasunik atuisinnaapput.

Imm. 5. Atorunnaarsitsisartog aqutsisunut ilaasortaasimassanngilaq, aningaasaateqarfiullu siunertaanut ingerlataanullu atatillugu arlaannaannulluunniit attuumassuteqartuussanani.

Atorunnaarsitsinerup nalunaarutiginera

§ 109. § 89, imm. 2-mi piumasaqaatit eqqortinneqareerpata, atorunnaarsitsinissamik aalajangerneq nalunaarsorneqassaaq nalunaarsorneqarnissamulluunniit nalunaarutigineqarluni, tak. § 12, imm. 1. Aalajangerneq pillugu nalunaarut kingusinnerpaamik nalunaarsuinerup imaluunniit nalunaarsorneqartussatut Erhvervsstyrelsimut, nalunaarsuinerup oqartussatut, nalunaarutigineqarnerata peqatigisaanik, aningaasaateqarfiup akiligassaqarfiinut ilisimaneqartunut tamanut nassiunneqassaaq.

Imm. 2. Aningaasaateqarfiup atorunnaarsinneqalersup atini attatiinnassavaa, »atorunnaarsinneqalersog«-mik ilallugu.

Imm. 3. Aningaasaateqarfimmi atorunnaarsitsinissamik aalajangiisoqarpat, aningaasaateqarfik pillugu pissutsit nalunaarsugaasut allannngortinneqarnissaat pillugu aalajangiisoqarsinnaanngilaq, tulliuuttut kisiisa pinnagit

- 1) atorunnaarsitsisartumik allanngineq,
- 2) kukkusersuisumik allanngineq,
- 3) aningaasaatinik amerlisitsinerit,

4) maannamut angerlarsimaffittut najukkami aningaasaateqarfimmut attaveqarsinnaanngikkaanni, imaluunniit pissutsit aalajangersimasut qaqutigooraluartumik taamaattariaqartippassuk, angerlarsimaffittut najukkap atorunnaarsitsisartup najugaanut allannortitsineq,

5) aallarteqqinneq, tak. § 119, aamma

6) kattunneq, tak. § 91, imm. 6, aamma § 99, imm. 3, taamaattoqarpallu § 106 malillugu aalajangersakkat saqqummiunneqartut.

Imm. 4. Imm. 3, nr. 1 malillugu atorunnaarsitsisartumik allannguineq taamaallaat aningaasaateqarfimmut oqartussanit aalajangerneqarsinnaavoq, tak. § 108, imm. 1. Pissutsit imm. 3, nr. 2-6-imi taaneqartut allannortinneqarnissaannik aalajangernissamut atorunnaarsitsisartup aalajangiinissaa allannguutinulluunniit isumaqataanissaa piumasagaataavoq. Aammattaaq pissutsinik imm. 3, nr. 2 aamma 4-6 malillugit aalajangiinerit, aamma aningaasaateqarfimmut oqartussanit akuersissutigineqassapput.

Akiligassaqarfimmut kaammattuutit

§ 110. Siulersuisut atorunnaarsitsinissamik aalajangernerata, tak. § 107, imm. 1, Erhvervsstyrelsiq qarasaasiaqarfianut nalunaarsorneqarnerani tassuunalu tamanut saqqummiunneqarnerani, aningaasaateqarfiup akiligassaqarfii qinnuigineqassapput ullormit tamanut saqqummiussiffiusumit qaammatit pingasut qaangiutsinnagit piumasagaatitik atorunnaarsitsisartumut nalunaarutigeqqullugit.

Imm. 2. Atorunnaarsitsisartup siusinnerpaamik imm. 1-imi piffissaliussaq naareerpat pigisat naammassillugit suliarisinnaalissavai.

Imm. 3. Pisassarisat nalunaarutigineqartut atorunnaarsitsisartup akuerisinnaanngippagit, akiligassaqarfik tamanna pillugu nalunaarfigineqassaaq. Aalajangiinerup akerlilernerneqarnissaa kissaatigineqarpat, nalunaarutip nassiunneqarneraniit kingusinnerpaamik sapaatit akunnerisa arfineq marluk qaangiunneranni suliap aningaasaateqarfiup angerlarsimaffigisaani pigisanik agguaaassisarnermut eqqartuussivimmut suliaassiissutigineqartussaana pillugu akiligassaqarfik ilisimatinneqassaaq.

Imm. 4. Pigisat naammassisussanngorlugit suliarineqareernerisa kingorna pisassarisat nalunaarutigineqartut, aningaasanit malittarisassat malillugit suli agguanneqanngitsunit matussuserneqassapput.

Atorunnaarsitsinerup nalaani ukiumoortumik nalunaarusiamik saqqummiussineq

§ 111. Peqqussummi matumani aamma ukiumoortumik naatsorsuutit pillugit inatsimmi, kunngip peqqussutaatigut Kalaallit Nunaanni aalajangersakkami, naatsorsuutitik saqqummiussineq kukkunerisiunerlu pillugit kiisalu ukiumoortumik nalunaarusiap Erhvervsstyrelsimut nassiunneqarnissaa pillugu aalajangersakkat aningaasaateqarfimmut inuussutissarsiornermik ingerlatsisunut atorunnaarsinneqalersunut assigisaanik atorneqassapput.

Atorunnaarsitsisartup suliassai, atorunnaarsitsinermut pissutaasut pingarnerit pillugit nassuiaat ilanngullugu

§ 112. Aningaasaateqarfiup inuussutissarsiornermik ingerlatsisup soqutigisai atorunnaarsitsisartup atorunnaarsitsinerup nalaani qulakkiissavai, aningaasaateqarfiullu naliliutaasa aningaasannortinnissaat aningaasaateqarfiullu pisussaaffiisa akilernerneqarnissaat isumagissallugu. Taamaallaat aningaasaateqarfiup naammaginartumik atorunnaarsinnissaanut

pisariaqartitaq tikillugu aningaasaateqarfiup sulinera atorunnaarsitsisartumit isumagineqarsinnaavoq.

Imm. 2. Atorunnaarsitsisartup aningaasaateqarfiup inuussutissarsiornermik ingerlatsisup suliai imaluunniit inatsisit aningaasaateqarfinnut tunngasut ima ilisimasaqarfigitigissavai, suliassap qanoq ittuuneranut annertussusaanullu naleqqiullugu suliarinnissinnaanermut ilisimasat naammassallutik.

Imm. 3. Atorunnaarsitsisartooq toqqarneqarnermi kingorna piaarnerpaamik atorunnaarsitsinermut pissutaasut pingaarnerpaat pillugit aningaasaateqarfinnut oqartussanut nassuiaammik saqqummiussissaaq, ilanngullugulu oqaatigalugu pillaatisiaqartitsinissaaq siunertaralugu misissuinerup aallartinnissaa tunngavissaqarnersoq.

Atorunnaarsitsisartup aningaasarsiaasa akuersissutiginerat aningaasaateqarfiullu aningaasaataanik agguaassineq

§ 113. Atorunnaarsitsisartup aningaasarsiasaminik aalajangersaanera, suliap annertussusaa qanoq ittuuneralu, akisussaaffik suliambut attuumassuteqartoq pissutsillu atuuttut atugaralugit angusat anguneqartut eqqarsaatigalugit pisussaaq, aningaasaateqarfinnut oqartussanit akuersissutigineqassaaq.

§ 114. § 110, imm. 1-imi piffissaliussaaq naareerpat, akiligassaqarfinnullu ilisimaneqartunut tamanut akiligassat akilerneqareerpat, atorunnaarsitsinermilu iluanaarutitik agguaassinissaaq aningaasaateqarfinnut oqartussanit akuersissutigineqarpat, atorunnaarsitsinermi iluanaarutitik agguaassisooqarsinnaavoq.

Imm. 2. Pigisanik suliarinninneq naammassippat, aningaasaateqarfiup inaarutaasumik atorunnaarsinneqarnera atorunnaarsitsisartumit aalajangerneqarsinnaavoq. § 110, imm. 3 malillugu isumaqatigiinngissutaasinnaasut aalajangiivigineqareertinnagit, pigisanik suliarinninneq naammassineqassanngilaq.

Imm. 3. Atorunnaarsitsinerup naammassineraniit kingusinnerpaamik sapaatit akunnerisa tallimat qaangiunneranni tamanna Erhvervsstyrelsen qarasaasiaqarfiani nalunaarsorneqassaaq nalunaarsorneqartussatulluunniit nalunaarutigineqassalluni. Atorunnaarsitsinermi naatsorsuutit atorunnaarsitsinermi iluanaarutit agguaanneqarnerannut uppersaatitallit nalunaarsuineranut nalunaaruteqarnermulluunniit ilanngussatut ilaatinneqassapput. Atorunnaarsitsinermi naatsorsuutit kukkunerisuiisumit akuerisaasumit kukkunerisorneqarsimassapput. Tamatuma kingorna aningaasaateqarfik Erhvervsstyrelsen nalunaarsuiffianit peerneqassaaq.

Pinngitsaaliissummik atuukkunnaarsitsineq

§ 115. Erhvervsstyrelsen nalunaarsuineranut oqartussat § 89, imm. 1 mianeralugu, aningaasaateqarfiup inuussutissarsiornermik ingerlatsisup angerlarsimaffiani pigisanik agguaassisarnermut eqqartuussivik qinnuigisinnaavaa aningaasaateqarfik atuukkunnaarseqqullugu, imaappat

- 1) ukiumoortumik naatsorsuutit pillugit inatsit, kunnigip peqqussutaatigut Kalaallit Nunaanni atuutsinneqalersooq malillugu ukiumoortumik nalunaarutit akuerisat pissusissamittut pissusillit piffissaagallartillugu aningaasaateqarfiup nassiussimannigippagit,
- 2) peqqussummi matumani malittarisassaniluunniit piumasarineqartut aningaasaateqarfik siulersuisooqannigippat kukkunerisuisooqaraniluunniit, aamma § 47, imm. 2, imaluunniit § 69, imm. 2 naapertorlugit siulersuisunik kukkunerisuiisumilluunniit nutaamik aningaasaateqarfinnut oqartussat toqqaanissaat naapertuutinnigitsutut nalilerneqarpat,

- 3) peqqussummi matumani malittarisassaniluunniit piumasarineqartutut piffimmi angerlarsimaffigisassami aningaasaateqarfik angerlarsimaffeqanngippat, imaluunniit
- 4) pisuni § 67, imm. 4-mut, imaluunniit § 118, imm. 2-mut ilaasuni atuukkunnaarsitsinissaq akuersissutigineqanngippat.

Imm. 2. Erhvervsstyrelsi nalunaarsuinerlut oqartussatut piffissaliussamik aalajangersaasinnaavoq, taannalu qaangertinnagu imm. 1 malillugu amigaatit aningaasaateqarfiup iluarsiniarsinnaavai. Kingusinnerpaamik piffissaliussap aalajangersagaasup naanerani amigaataasut iluarsineqarsimanngippata, Erhvervsstyrelsi nalunaarsuinerlut oqartussatut aningaasaateqarfik atuukkunnaarseqqullugu pigisanik agguaassisarnerlut eqqartuussivik qinnuigisinnaavaa, tak. imm. 1.

Imm. 3. Atuukkunnaarsitsineq inatsisitigut malittarisassatigulluunniit inassutigineqartoq, siulersuisunit akuerineqanngippat, Erhvervsstyrelsi aningaasaateqarfiup angerlarsimaffigisaani pigisanik agguaassisarnerlut eqqartuussivik qinnuigisinnaavaa aningaasaateqarfik atuukkunnaarseqqullugu.

§ 116. Aningaasaateqarfiup inuussutissarsiornermik ingerlatsisup pinngitsaaliissummik atorunnaarsinneqarnissaanik suliap pigisanik agguaassisarnerlut eqqartuussivimmut nassiunneqarnissaanik aalajangerneq Erhvervsstyrelsi qarasaasiaqarfiaatigut Erhvervsstyrelsi tamanut saqqummiutissavaa.

Imm. 2. Aningaasaateqarfiup atini attatiinnassavaa »pinngitsaaliissummik atuukkunnaarsinneqalersoq«-mik ilallugu.

Imm. 3. Pigisanik agguaassisarnerlut eqqartuussiviup atorunnaarsitsisartoq arlallilluunniit toqqarsinnaavai. Pigisanik agguaassisarnerlut eqqartuussiviup aamma kukkunerisuiisoq toqqarsinnaavaa. Pinngitsaaliissummik atuukkunnaarsitsinerlut kapitalimi matumani atorunnaarsitsinerlut maleruagassat atuupput, imaalillugilli inuk pigisanik agguaassisarnerlut eqqartuussiviup toqqagaa, imaluunniit inuk eqqartuussiviup tamatumunnga piginnaatitaa pissutsinik aningaasaateqarfimmut tunngasunik aalajangiisassalluni. Atuukkunnaarsitsinerlut aningaasartuutit pisariaqarpat naalagaaffiup karsianit akilerneqassapput.

Imm. 4. Pigisanik suliarinninneq naammassippat, pigisanik agguaassisarnerlut eqqartuussiviup tamanna Erhvervsstyrelsimut nalunaarsuinerlut oqartussaasumut nalunaarutigissavaa, taassumalu aningaasaateqarfiup atuukkunnaarnera Erhvervsstyrelsi qarasaasiaqarfianut nalunaarsussallugu.

§ 117. Aningaasaateqarfik inuussutissarsiornermik ingerlatsisoq pinngitsaaliissummik atuukkunnaarsinneqassaaq aalajangertoqarpat, aningaasaateqarfik pillugu pissutsit nalunaarsugaasut allanngortinneqarnissaat pillugu aalajangiisoqarsinnaanngilaq, tulliuuttut kisiisa pinnagit

- 1) atorunnaarsitsisartumik pigisanik agguaasarnermut eqqartuussivimmit toqqagaasumik ivertitsineq allannguinerluunniit, tak. § 116, imm. 3, oqaaseqatigiit siullit,
- 2) kukkunerisuiisumik pigisanik agguaassisarnerlut eqqartuussivimmit toqqagaasumik ivertitsineq allannguinerluunniit, tak. § 116, imm. 3, oqaaseqatigiit aappaat,
- 3) aallarteqqinneq, tak. § 120, imaluunniit
- 4) kattunneq, tak. § 91, imm. 7, aamma § 99, imm. 3, taamaattoqarpallu aalajangersakkat § 106 malillugu aalajangersagaasut.

Imm. 2. Atorunnaarsitsisartumik imm. 1, nr. 1 malillugu allanngiineq taamaallaat pigisanik agguaassisarnerlut eqqartuussivimmit aalajangerneqarsinnaavoq. Pissutsit imm. 1, nr. 2-4-imi taaneqartut allanngortinneqarnissaat aalajangiisagaanni, atorunnaarsitsisartup pigisanik agguaassisarnerlut eqqartuussivimmit toqqagaasup aalajangiisuunissaa isumaqataanissaaluunniit piumasaqaataavoq. Pissutsit imm. 1, nr. 3-miittut 4-miittullu

allanngortinneqarnissaannik aalajangiineq, aamma aningaasaateqarfinnut oqartussanit akuersissutigineqassaaq.

Imm. 3. Piffissami aningaasaateqarfiup pigisanik agguaassisarnermut eqqartuussivimmut ingerlateqqinneraniit atorunnaarsitsisartumik toqqaanissap aningaasaateqarfiulluunniit atuukkunnaarsinneqarnissaata tungaanut, maannamut aqutsisuusut taamaallaat pisariaqartunik, aningaasaateqarfinnut, ilanngullugit aningaasaateqarfiup siunertaanut, soqutigisaanut akiligassaqarfiinullu, ajoqutaanngitsumik piviusunngortinneqarsinnaasunik atuisinnaapput.

Imm. 4. Maannamut aqutsisuusut atorunnaarsitsinissap aallartinnerata tungaanut aningaasaateqarfiup sulinera pillugu paasissutissanik pigisanik agguaassisarnermut eqqartuussivimmik taamaattoqarpallu atorunnaarsitsisartumik, pigisanik agguaassisarnermut eqqartuussivimmit toqqagaasumik pisariaqartitamik ikiuunnissaq pisussaaffigaat. Aningaasaateqarfiup maannamut kukkunersiuksuanut assigisaa atuuppoq, pigisanik agguaassisarnermut eqqartuussivik aningaasaateqarfiup maannamut aqutsisuunit paasissutissanik pissarsinnaanngippat. Paasissutissat pigisanik agguaassisarnermut eqqartuussiviup taamaattoqarpallu atorunnaarsitsisartutut toqqagaasup, piumasagaatinik pioreersunik takkuttusanillu nalilersuinissaannut pisariaqarsinnaasut aqutsisut kukkunersiuksullu tunniutissavaat. Piginneqatigiiffissuarni aningaasaateqarfik suliffeqarfittut piginnittutut pinngitsaaliissummik atuukkunnaartussatut ingerlateqqinneqarpat, suliffeqarfinni pigisani aqutsisut assigisaanik pigisanik agguaassisarnermut eqqartuussivimmik taamaattoqarpallu atorunnaarsitsisartumik pigisanik agguaassisarnermut eqqartuussivimmit toqqagaasumik ikiuunnissamut pisussaaffeqarput.

Imm. 5. Pigisanik agguaassisarnermut eqqartuussiviup aqutsisunut siusinnerusukktu ilaasortaasimasut maannamullu kukkunersiuksuusooq pigisanik agguaassisarnermut eqqartuussivimmut aggersarsinnaavai, imm. 4 malillugu paasissutissanik pissarsiffiginissat siunertaralugu.

§ 118. Misussueqqissaartut aningaasaateqarfinnut oqartussanut allakkatigit nalunaarusiaminni aningaasaateqarfiup inuussutissarsiornermik ingerlatsisup atuukkunnaarsinneqarnissaanik kaammattuuteqarnerat misussueqqissaarnerup § 25 malillugu aallartinneqartup kingunerippagu, misussueqqissaartut nalunaarusiaata assilineqarneranik tigusinermit siulersuisut sapaatit akunneri sisamat qaangiutsinnagit siulersuisunik ataatsimiigiaqqusissapput, qulequtaq oqaluuserineqartussaattillugu.

Imm. 2. Siulersuisut siulersuisunik ataatsimiigiaqqusinnngippata, imaluunniit aningaasaateqarfinnik imm. 1 malillugu atuukkunnaarsitsiniarnatik siulersuisut aalajangerpata, aningaasaateqarfiup §§ 115-117-mi maleruagassat malillugit pinngitsaaliissummik atuukkunnaarsinnissaa aningaasaateqarfinnut oqartussat sulissutigisinnaavaat.

Aallarteqqinneq nangeqqikkallarnerlu

§ 119. Aningaasaateqarfik inuussutissarsiornermik ingerlatsisooq aallarteqqissasooq aalajangerneqarsinnaavoq, atorunnaarsitsinermi iluanaarutini § 114 malillugu agguaassineq suli aallartinneqarsimanngippat. Peqqussut manna malittarisassallu malillugit siulersuisunik kukkunersiuksumillu toqqaasoqarnissaa, aningaasaateqarfiullu tunngaviusumik aningaasaataasa pigineqarnerat pillugu naliliisartup nalunaarutaata § 33, imm. 2 malillugu suliarineqarnissaa aallarteqqinnissamut piumasagaataavoq. Tamatuma kingorna tunngaviusumik aningaasaatit, § 31-mi piumasarineqartunit ikinneruppata, aningaasaatit minnerpaamik taakkunatut amerlassuseqartunut amerlineqassapput.

Imm. 2. Pissutsit atorunnaarsitsinissamik aalajangernermik kinguneqartut maanna atuukkunnaarsimasut atorunnaarsitsilernerup nalaani paasinarsippat, imm. 1-imi aalajangersakkat aamma atuutissapput. Taamatut pisoqartillugu atorunnaarsitsilernerup unitsinneqarnissaa aningaasaateqarfiullu nutaamik suleqqilernissaa atorunnaarsitsisartup aalajangersinnaavaa.

Imm. 3. Imm. 1 imaluunniit 2 malillugu aallarteqqinnissamik aalajangerneq aningaasaateqarfinnut oqartussanit akuersissutigineqassaaq. Aallarteqqinnissamik aalajangerneq nalunaarsorneqassaaq nalunaarsorneqarnissamulluunniit nalunaarutigineqarluni, tak. § 12, imm. 1.

§ 120. Aningaasaateqarfik inuussutissarsiornermik ingerlatsisoq pigisanik agguaassisarnermut eqqartuussivimmi atuukkunnaartussatut suliarineqarnermi nalaani, pigisanik agguaassisarnermut eqqartuussivimmi suliarinninnerup unitsinneqarnissaa, aningaasaateqarfiullu aallarteqqinnissaa § 12, imm. 1 malillugu nalunaarsorpagu nalunaarsorneqartussatulluunniit nalunaarutigippagu § 119 assigisaanik atorneqassaaq.

Imm. 2. Aningaasaateqarfik pinngitsaaliissummik atuukkunnaartussatut ingerlateqqinneqarsimappat, pissutsit pinngitsaaliissummik atuukkunnaarsitsinissamut tunngaviliisut iluarsineqarsimanissaat aningaasaateqarfiup aallarteqqinneqarnissaanut piumasaqaataavoq. Kingusinnerpaamik aallarteqqinnissamut aalajangernerup peqatigisaanik iluarsiisoqassaaq, tak. § 119, imm. 1. Pissutsit iluarsineqarsimanerannik uppersaatit kingusinnerpaamik imm. 1. malillugu nalunaarsuinerup nalunaarsorneqarnissamilluunniit nalunaaruteqarnerup peqatigisaanik nassiunneqassapput. Piffissami aallarteqqinnissamik qinnuteqarnermi ukiunut naatsorsuiffiusunut tunniussinissamut piffissaliussat naareersimasunut, ukiumoortumik nalunaarusiat aningaasaateqarfiup suli tunniussimangippagit, ukiumoortumik nalunaarusiat taakku tiguneqarnissaat assigisaanik aallarteqqinnissamut piumasaqaataavoq.

Imm. 3. Pigisanik agguaassisarnermut eqqartuussivik atorunnaarsitsisartumik toqqaasimappat, aallarteqqinnissamut taanna isumaqataassaaq.

§ 121. Aningaasaateqarfiup inuussutissarsiornermikt ingerlatsisup pigisaasa atorunnaarsitsinerup naammassineqarnerata kingorna Erhvervsstyrelsip qarasaasiaqarfianit peerneqarsimasut, tak. § 114, imm. 3, aningaasanik amerlanerusunik agguaanneqartussanik saqqummertoqarpat nangeqqikkallarneqarnissaat pigisanik agguaassisarnermut eqqartuussiviup aalajangersinnaavaa. Aningaasaateqarfiup atorunnaarsimasup pigisaasa nangeqqikkallarneqarnissaannut tunngaviliisunik pissutsinik allanik atuuttoqarpat, nangeqqikkallartitsisoqarnissaa pigisanik agguaassisarnermut eqqartuussiviup ilanngullugu aalajangersinnaavaa.

Imm. 2. Siusinnerusukkut atorunnaarsitsisusup pigisat suliarinerat isumagissavaa. Taamatut pisoqarsinnaangippat, pigisanik agguaassisarnermut eqqartuussiviup imaluunniit atorunnaarsitsisartup, pigisanik agguaassisarnermut eqqartuussivimmit toqqaagaasup pigisat suliarinerat isumagissavaa.

Imm. 3. Pigisanik suliarinninnerup nangeqqikkallarnera taassumalu naammassinera pigisanik agguaassisarnermut eqqartuussiviup tamanna pillugu aalajangerneraniit kingusinnerpaamik sapaatit akunnerisa taallimat qaangiunneranni Erhvervsstyrelsip qarasaasiaqarfiani nalunaarsorneqassaaq nalunaarsorneqarnissamulluunniit nalunaarutigineqarluni.

Akiliisarnermik unitsitsinermut akiliisinnaajunnaarnermulluunniit ikaarsaariarneq

§ 122. Akiliisarnerup unitsinneqarnissaanik akiliisinnaajunnaarnermilluunniit qinnuteqaat taamaallaat aningaasaateqarfik sinnerlugu siulersuisunit, aningaasaateqarfinnut oqartussanit imaluunniit aningaasaateqarfik atorunnaarsinneqalerpat, atorunnaarsitsisartumit tunniunneqarsinnaavoq. Pigisanik agguaassisarnermut oqartussat Erhvervsstyrelsi nalunaarsuinermut oqartussatut akiliisarnerup unitsinneqarneranik akiliisinnaajunnaarnermilluunniit nalunaarfigissavaa.

Imm. 2. Atorunnaarsitsineq akiligassaqarfinnut tamakkiisumik akiliinermik kinguneqassanngitsoq atorunnaarsitsisartup paasiguniuk, atorunnaarsitsisartup akiliisarnermik unitsitsinissaq akiliisinnaajunaarnerluunniit qinnuteqaatigissavaa.

Imm. 3. Aningaasaateqarfik § 115, imm. 3 malillugu pinngitsaaliisummik atorunnaarsinneqalerpat, akiliisarnermik unitsitsinissamik akiliisinnaajunnaarnermilluunniit qinnuteqaat atorunnaarsitsisartup tunniutissavaa. Atorunnaarsitsisartumik toqqaasoqarsimangippat, pigisanik agguaassisarnermut eqqartuussiviup akiliisarnermik unititsinissaq akiliisinnaajunnaarnerluunniit nammineerluni aalajangersinnaavaa.

Imm. 4. Akiliisinnaajunnaarnermilluunniit qinnuteqaat tunniunneqarsimappat, aningaasaateqarfik pillugu pissutsit nalunaarsugaasut pillugit allannguisoqarnissaanik aalajangiisoqarsinnaanngilaq, kukkusersuisoq pigisanik agguaassisarnermut eqqartuussivimmit toqqaasoq kattunnerluunniit pillugi nalunaarsukkat, tak. § 91, imm. 8, kiisalu § 106 malillugu aalajangersagaasinnaasut kisiisa pinnagit.

Imm. 5. Aningaasaateqarfimmi pilersitseqqiisartup aqutsiffigilersimasaani, aningaasaateqarfik pillugu nalunaarsukkat allanngortinneqarnissaat pillugu aalajangiisoqarsinnaanngilaq, kukkusersuisoq pilersitseqqiisartumit toqqaasoq pillugu allannginerit kisiisa pinnagit.

§ 123. (Imm. 1 Kalaallit Nunaanni atuutsinneqalissanngilaq).

Imm. 2. Aningaasaateqarfiup akiliisinnaajunnaartutut suliarineqartup atini attatiinnassavaa »akiliisinnaajunnaartoq«-mik ilallugu.

Imm. 3. Akiliisinnaajunnaarnerup naammassinera Erhvervsstyrelsip qarasaasiaqarfiani nalunaarsorneqassaaq, pigisanik agguaassisarnermut eqqartuussiviup nalunaarutaani allamik allassimasoqanngippat.

Kapitali 13

Aningaasaateqarfiup inuussutissarsiornermik ingerlatsisup aamma aningaasaateqarfiup inuussutissarsiornermik ingerlatsisuunngitsup akornanni ikaarsaariarneq il.il.

§ 124. Aningaasaateqarfik atuuttoq peqqussummut matumunnga ilaatinneqalerpat, imaluunniit peqqussummit matumunnga ilaatinneqannginnissamut piumasagaatit atuukkunnaarpata, tamanna nalunaarsorneqassaaq nalunaarsorneqarnissamulluunniit nalunaarutigineqarluni, tak. § 12, imm. 1. Nalunaarsuinermut nalunaarsorneqarnissamulluunniit nalunaarummut siulersuisut nassuiaataat ilanngunneqassaaq, tassani aningaasaateqarfiup peqqussut manna malillugu nalunaarsorneqartussatut pisussaaffeqalersimasutut nalilerneqarnera tunngavilersorneqassalluni.

Imm. 2. Aningaasaateqarfik peqqussut manna malillugu nalunaarsorneqartussatut pisussaaffeqarnerisooq Erhvervsstyrelsip aalajangissavaa. Aningaasaateqarfiup pioreersup aningaasaateqarfittut inuussutissarsiornermik ingerlatsisutut nalunaarsorneqarnerani kapitali 5, § 27 kisiat pinnagu atorneqassanngilaq.

§ 125. Aningaasaateqarfiup inuussutissarsiornermik ingerlatsisup peqqussummut matumunnga ilaatinnera unippat, tamanna nalunaarsorneqassaaq nalunaarsorneqarnissamulluunniit nalunaarutigineqarluni, tak. § 12, imm. 1. Nassuiaat aningaasaateqarfiup peqqussummut matumunnga suna pissutigalugu ilaajunnaarsimasutut nalilerneqarnerannik tunngavilersuisoq nalunaarsuinermit nalunaarummulluunniit ilanngussatut ilanngunneqassaaq.

Imm. 2. Aningaasaateqarfik peqqussummut matumunnga ilaatinneqarunnaarpat, aningaasaateqarfik aningaasaateqarfiit inuussutissarsiornermik ingerlatsisut nalunaarsorneqarfiannit peerneqassaaq. Erhvervsstyrelsi Civilstyrelsi tamatumunnga ilisimatissavaa.

Kapitali 14

Taarsiissutit

§ 126. Pilersitsisut aqutsisunullu ilaasortat, suliaminnik suliarinninnerminni piaaralutik mianersuaalliorlutilluunniit aningaasaateqarfimmik inuussutissarsiornermik ingerlatsumik ajoqusiisimasut, tamatumunnga taarsiissuteqarnissamut pisussaaffeqarput. Inummik pingajuusumik ajoqusiisoqarsimappat, assigisaa atuuppoq.

Imm. 2. Kukkuersiuisut, naliliisartut misissueqqissaartitalluunniit taarsiissuteqarnissamut pisussaaffiat eqqarsaatigalugu, imm. 1-imi aalajangersagaq assigisaanik atorneqassaaq.

Imm. 3. Kukkuersiuisut piginneqatigiiffiat kukkuersiuisutut qinerneqarsimappat, kukkuersiuisut piginneqatigiiffiat kukkuersiuisorlu kukkuersiuititaasoq taarsiissuteqarnissamut pisussaataappat.

§ 127. Aqutsisunut ilaasortat, kukkuersiuisut, naliliisartut, misissueqqissaartitat pingajuusorluunniit akerleralugit § 126, imm. 1, oqaaseqatigiit siulliit malillugit eqqartuussivitsigut suliaasiinissamut aalajangiinerit, siulersuisunit aningaasaateqarfinnulluunniit oqartussanit aalajangerneqarsinnaapput.

§ 128. § 126 malillugu taarsiissutit ikilineqarsinnaapput, tamanna pisuutitaanerup qanoq sakkortutigineranut, ajoqusiinerup qanoq annertutigineranut pissutsillu sinnerinut naleqqiullugu naammaginartutut isigineqarpat.

Imm. 2. Arlallit peqatigiillutik taarsiissuteqarnissamut pisussaaffeqarpata, pineqartut nammaqatigiillutik taarsiissutinut akiliinissamut pisussaaffeqarput. Imm. 1-imili maleruagassat malillugit kinaluunniit taarsiissuteqarnissamut pisussaaffik sakkukillineqarsimappat, pineqartoq taamaallaat aningaasanik ikilisinneqartunik taarsissuteqarnissamut akisussaasuvoq. Taarsiissuteqarnissamut pisussaasut arlaata ataatsip taarsiissutit akilersimagunigit, pineqartup akisussaaqataasunut ataasiakkaanut tamanut imminerminnut agguaassat akileqqusinnaavai, ataasiakkaat qanoq annertutigisumik pisuutitaanerat pissutsillu allat mianeralugit.

§ 129. Aqutsisut, kukkuersiuisut, naliliisartut misissueqqissaartitalluunniit akerleralugit eqqartuussivitsigut suliaasiissutit piffimmi aningaasaateqarfiup angerlarsimaffigisaani eqqartuussivimmuut suliaasiissutigineqarsinnaapput.

Kapitali 15

Naammagittaalliorsinnaaneq

§ 130. Aalajangiinerit, aningaasaateqarfinnut oqartussat imaluunniit Erhvervsstyrelsiq nalunaarsuinermit oqartussatut peqqussut manna, imaluunniit aalajangersakkat peqqussut manna malillugit aalajangersagaasut malillugit aalajangigaasut, aalajangiinerup pineqartumut nalunaarutigineqarneraniit kingusinnerpaamik sapaatit akunnerisa arfineq marluk qaangiunneranni Erhvervsankenævnumut suliaassiissutigineqarsinnaapput. Aalajangiinerit Erhvervsankenævnumut suliaassiissutigeqqaarnagit eqqartuussivinnut suliaassiissutigineqarsinnaapput.

Imm. 2. Piffissaliussamilli § 16, imm. 1 malillugu aalajangersaaneq, aamma piffissaliussap sivitsorneqarneranik § 12, imm. 4 malillugu akuerineqarneq, kiisalu § 17, imm. 1, § 24, imm. 3, § 25, § 60, imm. 2, aamma § 75 malillugit aalajangiinerit ingerlatsisutut oqartussanut qaffasinnerusumut suliaassiissutigineqarsinnaanngillat.

Kapitali 16

Pineqaatissiissutit il.il.

§ 131. Inatsisit allat malillugit sakkortunerusumik pineqaatissinneqarluni pisuutitaasimannngikkaanni, Erhvervsstyrelsiq qarasaasiaqarfiani nalunaarsuineq aamma § 62, imm. 2 malillugu nalunaarutinik, nalilersuinermit nalunaarusianik nassiussineq, kiisalu aningaasaateqarfinnut oqartussanut imaluunniit Erhvervsstyrelsimut nalunaarsuinermit oqartussatut nalunaarutit pillugit peqqussummi matumani aalajangersakkanik unioqquitsinermi akiliisitsineq eqqartuussutaasassaaq.

Imm. 2. Aqutsisunut ilaasortat, kukkuneruisup atorunnaarsitsisartulluunniit peqqussut manna malillugu Erhvervsstyrelsimut nalunaarsuinermit oqartussatut imaluunniit aningaasaateqarfinnut oqartussanut pisussaaffitik piffissaagallartillugu eqqortinngippatigit, Erhvervsstyrelsiq nalunaarsuinermit oqartussatut imaluunniit aningaasaateqarfinnut oqartussat ullaqkaarunik imaluunniit sapaatit akunnikkaartunik akiliisitsisarnerit pineqartunut pinngitsaaliissutitut pisussaaffiliutsissinnaavaat.

§ 132. §§ 5-imik, 13-mik 15-millu, § 26, imm. 2-mik, § 34, imm. 2-mik, § 37, imm. 3-5-imik, § 38-mik, § 42, imm. 3-mik, §§ 49-51-mik, § 52, imm. 3-mik, § 53, imm. 4-mik, § 54-mik, §§ 56-59-mik, § 61-imik, § 62, imm. 1-imik, §§ 63-imik aamma 65-67-imik, § 76, imm. 2-mik, § 77-imik, § 78, imm. 1-imik imm. 6-imilu oqaaseqatigiit sisamannik, § 80-imik, § 83 oqaaseqatigiit sisamannik, § 85-imik, § 86, imm. 4-mik, § 87-imik, § 116, imm. 2-mi aamma §§ 117-mik 123-125-millu unioqquitsinernut akiliisitsineq eqqartuussutaasassaaq. Atuinerit § 87 akerleralugu pilersitaasut attatiinnarnerannut akiliisitsineq eqqartuussutaasassaaq.

Imm. 2. Inatsisit allat malillugit sakkortunerusumik pineqaatissinneqarluni pisuutitaasimannngikkaanni, kinaluunniit siulersuisut § 56, imm. 2, oqaaseqatigiit siulliit malillugit elektronik atorlugu ataatsimiinnerannut malinnaaniarluni peqataaniarluniluunniit, ilanngullugu elektronik atorlugu taaseqataaniarluni qarasaasiamut isissutissamik allatigulluunniit isissutaasinnaasumik pisinnaatitaaffiginagu ingerlatitseqqittoq atuisorluunniit akiliisitaanermik eqqartuunneqassaaq.

Imm. 3. Inatsisit allat malillugit sakkortunerusumik pineqaatissinneqarluni pisuutitaasimannngikkaanni, kinaluunniit elektronik atorlugu nalunaarutinik il.il., elektronik atorlugu attaveqatigiinneq pillugu § 56, imm. 3-mi aalajangersakkamut ilaatinneqartunik atuarniarluni, allannortitsiniarluni nassiussiniarluniluunniit atugassatut qarasaasiamut isissutissamik allatigulluunniit isissutaasinnaasumik pisinnaatitaaffiginagu ingerlatitseqqittoq atuisorluunniit akiliisitaanermik eqqartuunneqassaaq.

Imm. 4. Najoqqutassani, peqqussut manna malillugu aalajangersagaasuni, najoqqutassani aalajangersakkanik unioqqutitsinermi akiliisitsinermik pineqaatissiisoqartarnissaa aalajangersarneqarsinnaavoq.

Imm. 5. Piginneqatigiiffiit il.il. (inatsisitigut pisinnaatitaasut pisusaatitaasullu) pinerluttulerinermi inatsimmi kapitali 5-imi maleruagassat malillugit pinerluttulerinermi inatsisitigut akisussaataallutik eqqartuunneqarsinnaapput.

Imm. 6. Peqqussummi aalajangersakkanik imaluunniit maleruagassanik peqqussut malillugu suliarineqartunik unioqqutitsinerit pisoqalisoorinissaannut ukiut tallimat piffissarititaapput.

Kapitali 17

Atuutilersitsineq ikaarsaariarnermilu aalajangersakkat

§ 133. Peqqussutip matuma atuutilersinneranut piffissaliussaq inuussutissarsiornermut ineriartortitsinermullu ministerip aalajangersassavaa, taamaattoq tak. imm. 2-14. Peqqussutip immikkoortuisa assigiinngitsut ilaasa piffissani assigiinngitsuni atuuttussanngortinnissaat inuussutissarsiornermut ineriartortitsinermullu ministerip ilanngullugu aalajangersarsinnaavaa. (Oqaaseqatigiit aappaat Kalaallit Nunaanni atuutsinneqalissanngilaq).

Imm. 2. Aningaasaateqarfiit inuussutissarsiornermik ingerlatsisut pillugit inatsisip Kalaallit Nunaanni atuutsinneqalernissaa pillugit peqqussutip nr. 621, 23. juni 2008-meersup atorunnaarsinneqarnissaanut inuussutissarsiornermut ineriartortitsinermullu ministeri peqatigisaanik piginnaatinneqassaaq. Maleruagassat aalajangersimasut aningaasaateqarfiit inuussutissarsiornermik ingerlatsisut pillugit inatsisip Kalaallit Nunaanni atuutsinneqalernissaa pillugu peqqussut nr. 621, 23. juni 2008-meersumiittut ilaasa peqqussummi matumani maleruagassanit taarserneqarnissamik tungaannut atuuttuarallarnissaat inuussutissarsiornermut ineriartortitsinermullu ministerip ilanngullugu aalajangersinnaavaa.

Imm. 3. Aningaasaateqarfiit inuussutissarsiornermik ingerlatsisut pillugit inatsisip Kalaallit Nunaanni atuutsinneqalernissaa pillugu peqqussut nr. 621, 23. juni 2008-meersoq malillugu allaffissornikkut najoqqutassat allanngortinneqarnissamik atorunnaarsinneqarnissamilluunniit tungaanut atuutissapput.

Imm. 4. § 5, imm. 1 aamma 3, aamma §§ 28, 30 aamma 40 aningaasaateqarfimmut inuussutissarsiornermik ingerlatsisunut 1. januar 1985 sioqqullugu pilersinneqartunut atuutinngilaq. (Oqaaseqatigiit aappaat Kalaallit Nunaanni atuutilersinneqassanngilaq).

Imm. 5. Inatsit manna atuutileriarpat siulersuisut siullermik ataatsimiinneranni malittarisassat il.il. peqqussummut matumunnga siulersuisut naapertuuttunngortissavaat, taamaattoq tak. imm. 6-14.

Imm. 6. Peqqussut manna atuutileriarpat siulersuisut siullermik ataatsimiinneranni siulersuisut katitigaanerat sulersuisut § 37, imm. 3-mut 5-imullu naapertuuttunngortissavaat. Piffissat toqqagaaffiusut ingerlalereersut ataqqineqassapput, taamaattoq siulersuisut katitigaanerat peqqussutip matuma atuutileranerit kingusinnerpaamik ukiut sisamat qaangiunneranni 37, imm. 3-mut 5-imullu naapertuuttunngortinneqassaaq.

Imm. 7. Aningaasaateqarfinni inuussutissarsiornermik ingerlatsisuni, peqqussutip matuma atuutilersinneqarnera sioqqullugu pilersinneqartuni, aningaasaateqarfiup suliffeqarfinni pigisaani, suliffeqarfimmilu piginngisami, kisiannili aningaasaateqarfiup suliffeqarfiulluunniit taassuma pigisaata ingerlatsinikkut aningaasaqarnikkullu aqutsinermi annertuumik sunniuteqarfigisaani aqutsisut assigisaanilluunniit suliaqartitat aamma aqutsisunut ilaasortat assigisaanilluunniit suliaqartitat siulersuisunut ilaasortanik ikinnerussuteqartunik toqqaappata, siulersuisunut ilaasortat katitigaanerisa § 37, imm. 4-mut siulersuisunit

naapertuuttunngortinnissaat piumasaqaataanngilaq. Aningaasaateqarfinni inuussutissarsiornermik ingerlatsisuni, peqqussutip matuma atuutilersinneqarnera sioqqullugu pilersinneqartuni, aningaasaateqarfiup suliffeqarfinni pigisaani, suliffeqarfimmilu piginngisami, kisiannili aningaasaateqarfiup suliffeqarfiulluunniit taassuma pigisaata ingerlatsinikkut aningaasaqarnikkullu aqutsinermi annertuumik sunnuteqarfigisaani aqutsisut assigisaanilluunniit suliaqartitat aningaasaateqarfiup siulersuisuinut ilaasortanik ikinnerussuteqartunik toqqaasarpata, siulersuisunut ilaasortat oqaaseqatigiinnut siullernut naapertuuttunngortinneqassapput, taamaasilluni inuit pineqartut taamaallaat siulersuisuni ilaasortanik ikinnerussuteqartunik toqqaasassallutik. Piffissat toqqagaaffiusut ingerlalereersut ataqqineqassapput, taamaattoq siulersuisut katitigaanerat kingusinnerpaamik peqqussutip matuma atuutilerneraniit ukiut marluk qaangiunneranni oqaaseqatigiinnut siullernut naapertuuttunngortinneqassaaq.

Imm. 8. Siulersuisunit ilaasortat amerlanerussuteqartut suliffeqarfimmi aningaasaateqarfiup pilersitaani aqutsisunut ilaasortaappata, siulersuisut katitigaanerat § 40, imm. 2, oqaaseqatigiit aappaannut naapertuuttunngortinneqassaaq. Piffissat toqqagaaffiusut ingerlalereersut ataqqineqassapput, taamaattoq siulersuisut katitigaanerat peqqussutip matuma atuutilerneraniit kingusinnerpaamik ukiut marluk qaangiunneranni § 40, imm. 2, oqaaseqatigiit aappaannut naapertuuttunngortinneqassaaq.

Imm. 9. Siulersuisut ingerlatsisuminnik isumaqatigiissuteqarsimappata, isumaqatigiissut peqqussutip matuma atuutilerneraniit kingusinnerpaamik ukiup ataatsip qaangiunnerani § 43-mut naapertuuttunngortinneqassaaq.

Imm. 10. Peqqussutip matuma atuutilerneraniit kingusinnerpaamik ukiup ataatsip qaangiunnerani suleriaatsimut malittarisassat siulersuisut suliarissavaat, tak. § 50.

Imm. 11. Taasinerit amerlaqatigiitsillugit siulittaasup taasineri, siulittaasullu peqannginnerani siulittaasup tulliaat taasineri aalajangiisuussanersoq peqqussutip matuma atuutilerneraniit kingusinnerpaamik ukiup ataatsip qaangiunnerani siulersuisut aalajangiiffigissavaat, tak. § 53, imm. 3, tak. § 52, imm. 1.

Imm. 12. Kukkunersiuisumik toqqaaneq pillugu § 69-imi aalajangersagaq tamatumunngaluunniit atatillugu malittarisassani allannguisariaqarnerit kingusinnerpaamik peqqussutip matuma atuutilernerata kingorna ukiumoortumik naatsorsuutit ataatsimiissutigineranni siullermi eqqortinneqassapput.

Imm. 13. Aningaasaateqarfiit inuussutissarsiornermik ingerlatsisut pillugit inatsisip Kalaallit Nunaanni atuuttussanngortinneqarnissaa pillugu peqqussummi nr. 621, 23. juni 2008-meersumi § 39-mut ilaatinneqartut kingusinnerpaamik peqqussutip matuma atuuttussanngortinneranit ukiut marluk qaangiunneranni kukkunersiuisumik akuerisamik toqqaassapput, malittarisassanilu allannguutaasinnaasut pisariaqartut suliaralugit. Taamatut pisoqanngippat, aningaasaateqarfiup pineqartup § 3, imm. 2-mut ilaatitaannginnissani aningaasaateqarfinnut oqartussanut qinnuteqaatigissavaa.

Imm. 14. Kapitali 11 kattunnermut tunngasoq kattunnernut sulissutigineqalereersunut atorineqassanngilaq, taakkunani Erhvervsstyrelsen nalunaarsuinnermut oqartussatut, aningaasaateqarfiit inuussutissarsiornermik ingerlatsisut atorunnaarsitaasernerat pillugu nalunaarut (atorunnaarsitsineq, akiliisinnaajunnaarneq, pinngitsaaliissummik atorunnaarsitsineq aamma kattunneq) (Atorunnaarsitsisarnermik nalunaarut) nr. 781, 10. juli 2008-meersumi § 17 malillugu kattunnissamut pilersaarummik tigusisimanini tamanut saqqummiutereersimappagu. Kattunnernut sulissutigineqalereersunut oqaaseqatigiinnut siullernut ilaasunut, atorunnaarsitsisarnermik nalunaarummi maleruagassat atorineqassapput.

Imm. 15. Ikaarsaariarnermut aalajangersakkat imm. 5-14-imi taaneqartut saniatigut inuussutissarsiornermut ineriartortitsinermullu ministeri maleruagassanik allanik

aalajangersaasinnaavoq, peqqussummi matumani aalajangersakkanik atuilernissamut ikaarsaariarneq pisariillisinniarlugu pisariaqartitat annertussusii apeqqutaatillugit.

Kapitali 18 (Ilaatinneqanngilaq)

Kapitel 19 (Ilanngunneqassanngilaq)

¹ Inatsit nr. 722, 25. juni 2014-imeersumi § 136 aalajangersakkamik matuminnga imaqarpoq: "Inatsit Savalimmiunut Kalaallit Nunaanni atuutinngilaq, kunnigilli peqqussutaatigut Kalaallit Nunannut tamakkiisumik ilaannakortumilluunniit atuuttunngortinneqarsinnaavoq, Kalaallit Nunaanni pissutsit pisariaqartitaannik allannguutitalerlugu."

² Inatsit nr. 738, 1. juni 2015-imeersumi § 9, imm. 2 aalajangersakkamik matuminnga imaqarpoq: "Inatsit kunnigip peqqussutaatigut Kalaallit Nunaanni tamakkiisumik ilaannakortumilluunniit atuuttunngortinneqarsinnaavoq, Kalaallit Nunaanni pissutsit pisariaqartitaannik allannguutitalerlugu."